

Tug kws sau yog

# Yauhaa

## Txujlug kws muaj txujsa

**1** Thaus Vaajtswv tseem tsw tau tswm ntuj tswm teb, Vaajtswv Txujlug yeej muaj nyob lawm. Txujlug ntawm yeej ib txwm nrug Vaajtswv nyob, hab nwg yog Vaajtswv. 2 Thaus chiv keeb nwg ib txwm nrug Vaajtswv nyob. 3 Vaajtswv kuas nwg tswm ib puas tsaav yaam huvsw. Ib puas tsaav yaam ntawm tsw muaj ib yaam kws yuav tsw yog nwg tswm. 4 Vaajtswv Txujlug hov muaj txujsa. Txujsa hov txawj ua tsua tuabneeg pum kev. 5 Qhov kaaj ci tuaj tsua huv qhov tsaus ntuj. Kuas qhov tsaus ntuj laum tsw tau qhov kaaj hov tsaus.

6 Vaajtswv khaiv ib tug txwv neej npe hu ua Yauhaa lug, 7 Yauhaa qha qhov kaaj ntawm tsua suavdawg, kuas suavdawg tau nov hab lug ntseeg. 8 Yauhaa tsw yog qhov kaaj, nwg tsuas lug qha qhov kaaj ntawm xwb. 9 Qhov kaaj hov yog qhov kaaj tseeb kws lug ci tsua huv nplajteb nuav tsua txhua tsaav tuabneeg pum kev.

10 Yog le ntawm Vaajtswv Txujlug tub nyob huv nplajteb nuav lawm. Vaajtswv kuas Txujlug hov tswm nplajteb lug los tuabneeg nplajteb tsw paub nwg hab. 11 Nwg lug huv nwg teb nwg chaw los nwg tsaav tuabneeg tsw leeg yuav nwg. 12 Kuas txhua leej kws txais yuav nwg hab tso sab tsua nwg,

nwg kuj pub cov ntawm muaj feem lug ua Vaajtswv le mivnyuas. 13 Qhov kws puab ua tau Vaajtswv cov mivnyuas le ntawm, yeej tsw yog lawv le tuabneeg ib txwm muaj mivnyuas, lawv le ib txwm yuav tsum muaj nam muaj txwv txha xeeb tau mivnyuas. Vaajtswv yog puab txwv.

14 Vaajtswv Txujlug tub lug yug ua tuabneeg, nwg nrug peb nyob. Peb pum tas, nwg muaj fwjchim, nwg hlub peb kawg nkaus le, hab nwg yog qhov tseeb. Leej txwv pub fwjchim tsua nwg vem nwg yog leej txwv tuab leeg tub.

15 Yauhaa qha txug tug hov tsua suavdawg. Yauhaa has nrov nrov has tas, tug txwv neej nuav yog tug kws kuv tub xub qha tsua mej lawm tas, yuav muaj ib tug lawv kuv qaab tuaj, nwg muaj fwjchim luj dua kuv vem thaus tseem tsw tau yug kuv, nwg tub xub nyob lawm.

16 Nwg hlub peb kawg nkaus le nwg txha foom koob foom moov ntau nplua mag tsua peb. 17 Yaav taag lug lawm Vaajtswv kuas Mause sau ib txuj kevcai tsua peb coj, kuas nwnuav Vaajtswv kuas Yexu Kheto qha Vaajtswv txujkev hlub hab qhov tseeb tsua peb. 18 Ib txwm yeej tsw muaj leejtwg pum Vaajtswv ib zag le, tsuas yog Vaajtswv tuab leeg tub kws muaj fwjchim sws luag quas zog le Vaajtswv txha qha Vaajtswv tsua peb xwb, tsua qhov nwg yog tug kws nyob ntawm Vaajtswv lub xub ndag.

Yauhaa tsw yog tug Cawmseej  
(Mth 3:1-12, Mlk 1:1-8, Lk 3:1-18)

19 Cov Yutai kws nyob huv lub nroog Yeluxalee

khaiv cov pov thawj hab cov \*Levi tuaj nug Yauhaa has tas, koj yog leejtwg. 20 Yauhaa ca le qha tseeb tseeb tsua puab has tas, kuv tsw yog tug kws Vaajtswv khaiv lug ua tug Cawmseej. 21 Puab rov nug Yauhaa has tas, ua le ais koj yog leejtwg. Koj yog Eliya los. Yauhaa teb has tas, kuv tsw yog. Puab nug has tas, koj yog tug xwb-fwb kws cev Vaajtswv lug los. Yauhaa teb has tas, kuv tsw yog. 22 Puab txawm rov nug Yauhaa has tas, ua le mas ais koj yog leejtwg tag, koj ca le qha peb, peb txha paub rov moog qha tsua cov tuabneeg kws khaiv peb tuaj nug koj. Koj has saib koj yog leejtwg. 23 Yauhaa teb puab lawv le xwb-fwb Yaxaya kws cev Vaajtswv lug tau sau tseg has tas,

Kuv yog tug kws has nrov nrov tom tebchaws  
moj saab qhua has tas, khu kev kuas du  
quas lug tog tug tswv.

24 Cov tuabneeg kws cov Falixai khaiv tuaj ntawm nug Yauhaa has tas, 25 koj has tas, koj tsw yog tug Cawmseej, tsw yog Eliya, tsw yog tug xwb-fwb kws cev Vaajtswv lug. Ua caag koj tsua muab tuabneeg ua kevcai raus dej. 26 Yauhaa teb has tas, kuv muab tuabneeg ua kevcai raus dej tag. Kuas muaj ib tug nrug mej nyob ua ke ntawm nuav, mej tub tsw paub nwg. 27 Nwg yog tug kws lawv kuv qaab lug, kuv tub tsw tswm nyog daws nwg txuj nyuas hlua khau ntawm nwg kwtaw.

28 Tej nuav yog muaj tom lub zog Npethani kws nyob saab ntug dej Yalatee tim u, yog thaus Yauhaa saamswm muab tuabneeg ua kevcai raus dej.

Vaajtswv tug mivnyuas yaa

29 Nub tom qaab Yauhaa pum Yexu saamswm tua j tsua ntawm nwg. Yauhaa has tas, tug hov yog Vaajtswv \*tug mivnyuas yaa kws yuav rws tuabneeg nplajteb lub txem. 30 Tug hov yog tug kws kuv has tas, yuav muaj ib tug lawv kuv qaab lug. Tug hov muaj fwjchim luj dua kuv tsua qhov nwg yeej ib txwm muaj nyob thaus tsw tau yug kuv. 31 Thaus kuv has le ntawm kuv tseem tsw tau paub has tas, tug hov yog leejtwg. Kuas kuv lug muab tuabneeg ua kevcai raus dej sub cov tuabneeg Yixayee txha paub nwg.

32 Yauhaa ua tim khawv has tas, kuv pum Vaajtswv tug Ntsuj Plig zoo yuav thooj le tug nquab yaa sau ntuj lug tsaws sau nwg taubhau, 33 kuas kuv tseem tsw tau paub tas, nwg yog leejtwg. Kuas Vaajtswv kws khaiv kuv lug muab tuabneeg ua kevcai raus dej has tsua kuv tas, koj yuav pum Vaajtswv tug Ntsuj Plig lug tsaws sau ib tug txwv neej taubhau. Tug ntawm laub, yog tug kws yuav muab tuabneeg ua kevcai raus huv Vaajtswv tug Ntsuj Plig. 34 Hab Yauhaa has tas, kuv lub qhov muag tub pum lawm, kuv txha ua tau tim khawv has tas, nwg yog Vaajtswv tug tub.

Cov kws Yexu xub hu lug ua thwjtim

35 Nub tom qaab thaus Yauhaa saamswm nrug Yauhaa ob tug thwjtim sawv ua ke, Yauhaa pum Yexu tua j moog. 36 Yauhaa has tsua ob tug thwjtim has tas, meb saib tug ntawm yog Vaajtswv tug mivnyuas yaa. 37 Yauhaa ob tug thwjtim nov Yauhaa has le hov, tes ob tug txawm lawv Yexu qaab

moog. 38 Yexu tig hlo lug pum ob tug, Yexu nug ob tug has tas, meb nrhav leejtwg. Ob tug teb has tas, xwbfbw koj su hov twg. 39 Yexu teb has tas, meb tuaj saib maj. Ob tug txawm moog saib Yexu lub chaw nyob. Thaus puab moog txug nub tub taj quas lag lawm, ob tug nrug Yexu nyob ib nyuas tsaam.

40 Ob tug kws nov Yauhaa has ais txawm ca le lawv Yexu qaab moog ntawm, muaj ib tug yog Ximoo Pestus tug kwv Aatali. 41 Aatali txawm ca le moog hu Aatali tug tijlaug Ximoo. Nwg has tsua Ximoo has tas, peb tub ntswb tug Cawmseej kws Vaajtswv khaiv lug lawm. 42 Aatali koj Ximoo moog cuag Yexu. Yexu saib Ximoo ntsej muag, Yexu has tsua Ximoo has tas, koj yog Yauhaa tug tub Ximoo, luas yuav hu koj hu ua Kefa. Lub npe Kefa hab Pestus yog txhais has tas pob zeb.

### Yexu hu Fili hab Nathane

43 Nub tom qaab thaus Yexu yuav moog peg Kalilai tebchaws Yexu moog hu Fili has tas, Fili koj ca le nrug kuv moog. 44 Fili yeej nyob peg lub moos Npexayata ib yaam le Aatali hab Pestus. 45 Fili txawm moog hu Nathane has tas, peb tub ntswb Yauxej kws nyob Naxale tug tub Yexu lawm. Yaav taag lug lawm Mause tub sau has txug tug tub ntawm tsua huv phoo ntawv qha Vaajtswv kev-cai lawm. Cov xwbfbw cev Vaajtswv lug puab puav leej sau has txug nwg hab. 46 Nathane teb Fili has tas, tsw laam muaj ib tug tuabneeg tswm txaj lug yug tsua huv lub zog Naxale kab. Fili teb has tas, koj nrug kuv moog saib maj.

47 Thaus Yexu pum Nathane saamswm tuaj cuag

Yexu, Yexu has tas, tug ntawm yog tuabneeg Yixa-  
yee tag. Nwg lub sab tsw nkhaus ib nyuas qhov  
le. 48 Nathane nug Yexu has tas, ua caag koj  
txawm swv paub kuv lawm. Yexu teb has tas,  
thaus Fili tseem tsw tau hu koj, koj tseem  
nyob huv qaab tsob ntoo cua, kuv tub yeej pum  
koj lawm. 49 Nathane has tas, xwbfwb koj yog  
Vaaajtswv tug tub. Koj yog cov Yixayee tug vaa  
ntxwv tag tag le. 50 Yexu has tsua Nathane has  
tas, Nathane, koj nov kuv has tas, kuv pum koj  
nyob huv qaab tsob ntoo cua, koj txha le ntseeg  
los. Koj yuav pum tej xwm kws tseem ceeb dua le  
nuav hab. 51 Hab Yexu has tas, kuv qha tseeb  
tsua mej has tas, mej yuav pum rooj ntug qheb,  
hab pum Vaaajtswv cov tubkhai sau ntuj moog moog  
lug lug ntawm Tuabneeg Leej Tub lub xub ndag.

### Ua tshoob huv lub zog Khana

**2** Tau ob nub tom qaab muaj tuabneeg ua ib rooj  
tshoob huv Kalilai tebchaws huv lub zog Khana.  
Yexu nam moog nrug puab ua tshoob hab. 2 Puab  
hu Yexu hab Yexu cov thwjtim moog hab. 3 Suav-  
dawg noj haus txug tog, ua cav kua txwv maab xwv  
taag lawm. Yexu nam txawm has tsua Yexu has tas,  
kua txwv maab taag lawm. 4 Yexu teb has tas, tsw  
taag koj yuav has le kos tsua kuv. Tseem tsw  
tau txug kuv lub swmhawm. 5 Yexu nam has tsua  
cov tub qhe has tas, nwg kuas mej ua daabtsw,  
tes mej ca le ua lawv le nwg has.

6 Cov Yutai yeej ib txwm coj kevcai ntxuav.  
Yog le ntawm txha muaj rau lub hub nyob ntawm.  
Cov hub hov ib lub ntim tau plaub tswb thoob dej.  
7 Yexu has tsua cov tub qhe has tas, mej ca le  
moog nqaa dej lug ntim tsua cov hub nuav kuas



puv. Tes puab txawm moog nqaa dej lug ntim puv nkaus txhua lub huvsw. 8 Yexu txawm has tsua puab has tas, mej ca le ntaus mivntswv nqaa moog tsua tug kaav xwm. Puab txawm ntaus nqaa moog tsua tug kaav xwm. 9 Thaus tug kaav xwm swm cov dej kws txa ua kua txwv maab xwv lawm, nwg xaav tsw thoob le. Nwg tsw paub sov puab nqaa cov kua txwv maab xwv ntawm hov twg lug, kuas cov tub qhe kws ntaus cov dej hov puab yeej paub. Tug kaav xwm txawm hu tug nraug vauv lug has tas, 10 luas yeej ib txwm xub muab cov thawj kua txwv maab xwv lug haus ua ntej tsaiv, thaus suavdawg haus ntau lawm, le maav muab cov tw lug haus. Kuas koj tsw ua le ntawm, koj tsua muab cov thawj tseg ca haus ua qaab.

11 Zag txujci tseem ceeb nuav Yexu ua huv lub zog Khana kws nyob kuv Kalilai tebchaws. Zag nuav yog thawj zag kws Yexu ua txujci tseem ceeb. Nwg ua le ntawm qha kuas suavdawg pum nwg tug fwjchim. Nwg cov thwjt看 pum le hov puab txha ntseeg heev. 12 Dhau hov ntawm Yexu hab Yexu nam, hab Yexu cov kwv hab Yexu cov thwjt看 puab moog peg lub moos Kapena-oo, puab moog nyob peg tau ob peb nub.

Yexu moog tom lub tuam tsev

(Mth 21:12-13, Mik 11:15-17, Lk 19:45-46)

13 Thaus yuav txug lub caij kws cov tuabneeg ua kevcai hlaa dhau, Yexu txawm moog nraag lub nroog Yeluxalee. 14 Yexu pum tuabneeg tuaj muag nyuj muag yaaj muag nquab hab pum cov tuabneeg pauv nyaj nyob pawg quas lug ntawm puab tej rooj huv lub tuam tsev tej qaab khaav. 15 Yexu txawm

zuas zog ib cov hlua lug quav npho ua ib raab nplawm, Yexu txawm lawv tej nyuj hab tej yaaj tswv tawm huv lub tuam tsev moog huvsw. Yexu muab cov tuabneeg pauv nyaj tej rooj ntseev pis hlo tseg, puab tej nyaj poob dawb vog tsua huv aav. 16 Yexu has tsua cov tuabneeg muag nquab has tas, mej ca le muab mej tej nquab nqaa tswv moog taamswm nuav. Tsw yooj tuaj ua laag ua luam huv kuv txwv lub tsev nuav hlo le.

17 Thaus Yexu cov thwjtim pum le ntawm puab txawm ncu dheev txug tej lug kws sau ca tsua huv Vaajtswv phoo ntawv has tas, Vaajtswv, kuv mob sab tsua koj lub tsev heev ib yaam le ib teg tsau hlawv kuv lub sab.

18 Cov Yutai lug nug Yexu has tas, koj yuav ua txujci tseem ceeb daabtsw qha tsua peb paub has tas, koj tau fwjchim hov twg es koj muaj cuab kaav tuaj ua le nuav. 19 Yexu teb has tas, mej ca le muab Vaajtswv lub tsev nuav lauj kag pov tseg, mas peb nub xwb kuv yeej rov ua tau ib lub tshab. 20 Cov Yutai txawm has tas, lub tuam tsev thov Vaajtswv nuav, peb kaam ua tau plaub caug rau xyoo dag txha le tau. Ua caag koj laam has tas, peb nub xwb koj yuav ua tau ib lub tshab nua.

21 Vaajtswv lub tsev kws Yexu has hov, tub yog Yexu has txug Yexu lub cev. 22 Thaus Vaajtswv tsaa Yexu sawv huv qhov tuag rov qaab lug lawm, Yexu cov thwjtim txawm ncu dheev txug tej lug kws Yexu has ntawm. Puab txha le ntseeg tej lug kws sau ca tsua huv Vaajtswv phoo ntawv, hab ntseeg Yexu tej lug.



Yexu paub tuabneeg lub sab

23 Lub caij kws suavdawg ua kevcai hlaa dhau ntawm, Yexu tseem nyob huv lub nroog Yeluxalee. Muaj tuabneeg coob coob ntseeg Yexu tej lug, tsua qhov puab pum tej txujci luj kws Yexu ua. 24 Kuas Yexu tsw ca sab tsua puab, Yexu yeej paub suavdawg lub sab lawm. 25 Yexu paub txhua tug lub sab huvsw, tsw txug leejtwg yuav qha ib yaam daabtsw tsua nwg.

Nikautemau moog cuag Yexu mo ntuj

**3** Muaj ib tug txwv neej npe hu ua Nikautemau. Nwg yog cov Falixai, nwg ua cov Yutai ib tug thawj. 2 Nwg tuaj cuag Yexu mo ntuj. Nwg has tsua Yexu has tas, xwbfbw, peb paub has tas, koj yog ib tug xwbfbw kws Vaajtswv khaiv lug. Tsw muaj leejtwg yuav ua tau tej txujci tseem ceeb kws koj ua nuav, yog Vaajtswv pub fwjchim tsua tug twg, tug ntawm txha ua tau xwb. 3 Yexu teb has tas, kuv qha tseeb tsua koj has tas, tug kws tsw tau yug dua tshab yuav tsw tau lug ua Vaajtswv le tuabneeg hab yuav tsw pum Vaajtswv lub tebchaws le. 4 Nikautemau nug Yexu has tas, ib tub laug lawm yuav ua le caag yug dua tshab nua, nwg yeej rov tsw tau tsua huv nwg nam lub plaab es rov yug dua ib zag le. 5 Yexu teb has tas, kuv qha tseeb tsua koj has tas, tug kws tsw tau yug ntawm dej hab ntawm Vaajtswv tug Ntsuj Plig lug, tug ntawm yeej yuav tsw tau lug ua Vaajtswv le tuabneeg hab yuav tsw pum Vaajtswv lub tebchaws le. 6 Tug kws yog tuabneeg yug, tug ntawm yeej yog tuabneeg. Tug kws yog Vaajtswv tug Ntsuj Plig yug, tug ntawm yeej yog ntsuj plig.

7 Koj tsw xob poob sab tsua tej lug kws kuv qha tsua koj has tas, txhua tug yuav tsum yug dua tshab. 8 Cua yuav ntsawj moog saab twg los yeej tsw muaj leejtwg txwv tau. Koj nov cua nrov kuas koj tsw paub sov cua tawm hov twg tuaj hab yuav moog tsua hov twg. Ib yaam nkaus le ntawm koj yeej tsw paub sov txhua tug kws Vaaajtswv tug Ntsuj Plig yug, yog yug le caag. 9 Nikaute-mau nug Yexu has tas, yuav ua le caag ua tau lawv le tej kws koj has kos. 10 Yexu teb has tas, koj tub yog cov Yixayee ib tug xwbfbw kws suavdawg fwm ne, ua caag koj tseem tsw tau paub tej nuav. 11 Kuv qha tseeb tsua koj has tas, peb has tej kws peb paub hab qha tej kws peb pum xwb los mej cov tsw muaj ib tug ntseeg tej lug kws peb qha tsua koj nuav. 12 Kuv has txug tej kws nyob huv nplajteb nuav xwb mej tub tsw ntseeg. Yog kuv tseem has txug tej kws nyob sau ntuj ceeb tsheej hab tes mej yimfuab yuav tsw ntseeg le. 13 Yeej tsw tau muaj leejtwg moog sau ntuj ceeb tsheej ib zag le, tsuas yog Tuabneeg Leej Tub kws ngeg sau ntuj ceeb tsheej lug tuab leeg moog xwb.

14 Luas yuav muab Tuabneeg Leej Tub teem tsua sau ntoo ib yaam le thau Mauxe teem tug naab tooj tom tebchaws moj saab qhua. 15 Tuabneeg Leej Tub yeej yuav raug teem le hov, sub txhua tug kws ntseeg nwg, txha le tau txujsa ntev moog ib txhws tsw kawg. 16 Yog Vaaajtswv hlub hlub tuabneeg nplajteb Vaaajtswv txha le khaiv nwg tuab leeg tub lug tsua huv nplajteb. Sub txhua tug kws ntseeg hab tso sab tsua nwg leej tub txha tsw tuag, kuas yuav tau txujsa ntey moog ib txhws tsw kawg. 17 Qhov kws Vaaajtswv khaiv Vaaaj-

tswv leej tub lug huv nplajteb nuav, tsw yog khaiv lug teem txem tsua tuabneeg nplajteb, yog nwg khaiv lug paab tuabneeg nplajteb kuas puab dim puab lub txem.

18 Cov kws ntseeg Vaajtswv tug tub, mas yuav tsw raug teem txem, kuas cov kws tsw ntseeg Vaajtswv tug tub, mas tub raug teem txem lawm vem puab tsw ntseeg Vaajtswv tuab leeg tub.

19 Tog Vaajtswv teem txem tsua tuabneeg los yog tim le nuav, Vaajtswv tub ua qhov kaaj ci lug tsua huv nplajteb nuav lawm, kuas tuabneeg nyam qhov tsaus heev dua nyam qhov kaaj hab tuabneeg yeej nyam ua phem. 20 Tug kws nyam ua phem yeej tsw nyam qhov kaaj. Nwg tsw kaam lug nyob huv qhov kaaj tsua qhov nwg ntshai tsaam suavdawg pum nwg tej kev txhum. 21 Tug kws nyam ua zoo nwg yeej yuav lug nyob huv qhov kaaj, kuas suavdawg pum has tas, nwg ua nwg teg num lawv le Vaajtswv lub sab nyam.

### Yexu muaj fwjchim luj dua Yauhaa

22 Dhau hov ntawm Yexu hab Yexu cov thwjtim moog nyob ib ntus huv Yutai tebchaws. Puab muab tuabneeg ua kevcai raus dej. 23 Thaus hov Yauhaa pheej muab tuabneeg ua kevcai raus dej tom lub zog Ainoo kws nyob ze ze lub zog Xali, tsua qhov tom muaj dej ntau. Naj nub muaj tuabneeg moog thov Yauhaa muab puab ua kevcai raus dej.

24 Thaus ntawm Yauhaa tseem tsw tau raug luas muab kaw tsua huv tsev loj faaj.

25 Yauhaa cov thwjtim muaj qee leej nrug ib tug tuabneeg Yutai sws caam has txug tej kevcai ntxuav. 26 Cov thwjtim txawm moog has tsua Yau-

haa has tas, xwbfbw, koj ncu tau tug kws nrug  
 koj nyob tom tug nam dej Yalatee saab tim u los  
 tsw tau, tug kws koj has ntawm nwgnuav nwg saam-  
 swm muab tuabneeg ua kevcai raus dej. Suavdawg  
 puav leej moog cuag nwg huvsw. 27 Yauhaa teb has  
 tas, txhua yaam kws tuabneeg muaj, puav leej yog  
 Vaajtswv pub tsua puab. 28 Tej lug kws mej nov  
 kuv has tas, kuv tsw yog tug kws Vaajtswv khaiv  
 lug ua tug Cawmseej, kuv tsuas yog tug kws Vaaj-  
 tswv khaiv ua nwg ntej lug xwb. Mej yeej ua  
 tau tim khawv has tas, kuv has le ntawm tag.  
 29 Tug nkauj nyaab yeej yog tug nraug vauv quas-  
 puj. Tug phij laaj tsuas yog sawv noog xwb.  
 Thaus tug phij laaj nov tug nraug vauv tej lug  
 nwg zoo sab kawg le. Nwgnuav kuv zoo sab heev  
 ib yaam le ntawm. 30 Tug hov yeej yuav muaj fwj-  
 chim luj quas zug. Kuas kuv yuav ua yau quas zug.

### Tug kws lug sau qaum ntuj lug

31 Tug kws lug sau qaum ntuj lug nwg muaj  
 fwjchim luj dua ndais suavdawg huvsw. Tug kws  
 nyob huv nplajteb, nwg yeej yog tuabneeg nplaj-  
 teb, nwg has tuabneeg nplajteb zaaj xwb. Tug  
 kws lug sau qaum ntuj lug nwg muaj fwjchim luj  
 dua ib puas tsaav yaam. 32 Nwg pav tej kws nwg  
 pum hab tej kws nwg nov lawm tsua suavdawg  
 noog, kuas tsw muaj tuabneeg ntseeg tej lug kws  
 nwg has. 33 Tug kws ntseeg nwg tej lug, kuj yog  
 tug hov leeg has tas, Vaajtswv yog tug ncaaj  
 nceeg. 34 Tug kws Vaajtswv khaiv lug, nwg yeej  
 has Vaajtswv tej lug xwb, tsua qhov Vaajtswv tso  
 Vaajtswv tug Ntsuj Plig kaav taag nrho nwg lub  
 sab. 35 Leej txwv hlub leej tub kawg le nwg txha  
 le tsaa leej tub ua tug kaav taag nrho ib puas

tsaav yaam huvsw. 36 Tug kws ntseeg Vaaajtswv tug tub, tug hov muaj txujsa ntev moog ib txhws tsw kawg, kuas tug kws tsw noog Vaaajtswv tug tub lug mas yuav tsw tau txujsa, hab Vaaajtswv yuav chim tsua tug hov moog ib txhws.

### Yexu qha tug puj Xamali

**4** Cov Falixai nov has tas, Yexu tau thwjtim ntau dua Yauhaa, hab muab tuabneeg ua kevcai raus dej ntau dua Yauhaa. 2 Qhov tseeb, Yexu yeej tsw tau muab tuabneeg ua kevcai raus dej, tsuas yog Yexu cov thwjtim muab xwb. 3 Thaus Yexu nov has tas, muaj tuabneeg has le ntawm, Yexu txawm tawm huv Yutai tebchaws rov qaab moog peg Kalilai tebchaws. 4 Nwg taug txujkev kws hlaa Xamali tebchaws moog.

5 Yexu moog txug huv Xamali tebchaws ib lub moos npe hu ua Xikha. Lub moos hov nyob ze ze thaaj aav kws Yakhauj muab tsua Yakhauj tug tub Yauxej. 6 Thau u Yakhauj khawb ib lub qhov dej tsua ntawm. Thaus Yexu taug kev tuaj txug ntawm lub qhov dej kwvlaam nub ntseg, nwg txug sav heev tes nwg txawm su ntawm.

7 Muaj ib tug quaspuij Xamali tuaj nqaa dej. Yexu has tsua tug quaspuij ntawm has tas, thov koj has mivntswv dej tsua kuv haus saib, 8 vem Yexu cov thwjtim tub moog yuav mov tom moos lawm. 9 Tug quaspuij Xamali txawm teb Yexu has tas, koj yog tuabneeg Yutai, kuv yog tuabneeg Xamali, ua caag koj laam thov kuv has dej tsua koj haus. Tog tug puj hov teb le ntawm los vem cov Yutai yeej tsw kaam koom cov Xamali tej taig

dav. 10 Yexu teb nwg has tas, yog koj paub yaam kws Vaaajtswv yuav pub tsua koj, hab paub has tas, tug kws thov koj dej haus yog leejtwg, tes koj yeej yuav xub thov nwg, nwg yuav pub cov dej kws cawm txujsa tsua koj haus. 11 Tug quaspuj hov txawm has tsua Yexu has tas, xwbfbw, koj tub tsw muaj daabtsw ntaus dej ne, lub qhov dej nuav tub kawg le. Koj yuav moog muab cov dej kws cawm txujsa ntawm hov twg lug. 12 Peb yawm koob Yakhauj khawb lub qhov dej nuav tsua peb. Nwg hab nwg cov tub hab nwg tej tsaj puav leej haus lub qhov dej nuav. Koj tseem muaj fwjchim luj dua peb yawm koob Yakhauj hab los. 13 Yexu teb has tas, tug kws haus lub qhov dej nuav, nwg tseem yuav rov nqhes dua hab. 14 Kuas tug kws haus cov dej kws kuv yuav pub tsua nwg, tug hov yuav tsw nqhes ib txhws le lawm. Cov dej kws kuv pub tsua nwg yuav txhawv huv nwg lub sab, hab yuav cawm nwg txujsa moog ib txhws. 15 Tug quaspuj hov txawm has tsua Yexu has tas, xwbfbw, thov koj pub cov dej kws koj has kos tsua kuv haus, es kuv txha le tsw nqhes hab tsw txug tuaj nqaa dej ntawm lub qhov nuav lawm. 16 Yexu has tsua nwg has tas, koj moog hu koj tug quasyawg tuaj ntawm nuav. 17 Nwg teb Yexu has tas, kuv tub tsw muaj quasyawg a. Yexu has tas, koj has tas, koj tsw muaj quasyawg koj has tseeb tag laub. 18 Koj tub yuav tswb tug quasyawg lawm, tug kws nwg nuav nrug koj nyob yeej tsw yog koj tug quasyawg. Koj kuj has tseeb tag laub. 19 Tug quaspuj hov has tsua Yexu has tas, xwbfbw, nwg nuav kuv paub tas, koj yog ib tug xwbfbw cev Vaaajtswv lug. 20 Peb cov Xamali tej puj koob yawm koob ib txwm tuaj pe Vaaajtswv sau lub roob nuav. Kuas mej cov Yutai mej has tas,



suavdawg yuav tsum moog pe Vaajtswv nraag lub nroog Yeluxalee txha yog. 21 Yexu has tsua tug quaspuj hov has tas, koj ca le ntseeg kuv tej lug. Yuav muaj ib lub swmhawm kws tuabneeg yuav tsw tuaj pe Vaajtswv sau lub roob nuav, hab tsw moog pe Vaajtswv nraag lub nroog Yeluxalee lawm. 22 Mej cov Xamali mej tsw paub tug kws mej naj nub pe yog leejtwg. Kuas peb cov Yutai peb paub tug kws peb pe, tsua qhov tug Cawmseej kws paab tuabneeg yog tshwm huv cov Yutai lug. 23 Yeej yuav muaj ib lub swmhawm kws cov kws pe Vaajtswv tag tag le yuav pe Vaajtswv huv lub sab hab ua lub sab dawb paug pe. Vaajtswv kws yog peb leej txwv pheej xaav kuas tuabneeg pe nwg le hov. Mas tub txug lub swmhawm kws pe le hov lawm. 24 Vaajtswv yog ntsuj plig. Mas tug kws pe Vaajtswv yuav tsum pe Vaajtswv huv lub sab, hab ua sab dawb paug pe tag tag.

25 Tug quaspuj hov has tsua Yexu has tas, kuv paub has tas, Vaajtswv yuav khaiv tug kws suavdawg hu ua tug Cawmseej lug. Thaus nwg lug lawm, nwg yuav qha txhua yaam huvsw tsua peb. 26 Yexu teb has tas, tug kws saamswm nrug koj thaam nuav tub yog tug ntawm ntaag.

27 Taamswm hov Yexu cov thwjt看im rov lug txug. Puab pum Yexu nrug tug quaspuj ntawm thaam puab xaav tsw thoob le. Kuas tsw muaj ib tug kaam nug tug quaspuj ntawm has tas, koj xaav yuav daabtsw. Lossws nug Yexu has tas, ua caag koj laam nrug tug quaspuj hov thaam.

28 Tes tug quaspuj hov txawm muab nwg lub hub dej tso plhuav tseg, nwg rov moog tom moos mas

nwg has tsua cov tuabneeg kws nyob huv lub moos has tas, 29 mej ca le moog saib tug txwv neej kws nyob tom saib. Nwg qha ib puas tsaav yaam kws kuv tau ua lug lawm huvsw tsua kuv noog. Nwg yog tug kws Vaajtswv khaiv lug ua tug Cawm-seej sub. 30 Suavdawg txawm tawm zum quas zawg tom moos tuaj saib Yexu.

31 Thaus ntawm cov thwjtim hu Yexu has tas, xwbfwb, lug noj mov lauj. 32 Kuas Yexu teb has tas, kuv tub muaj mov noj lawm. Tej mov ntawm mej yeej tsw tau paub. 33 Cov thwjtim txawm sws nug has tas, leejtwg nqaa mov tuaj tsua nwg noj lawm ne. 34 Yexu has tsua cov thwjtim has tas, kuv tej mov yog qhov kws kuv ua lawv le tug kws khaiv kuv lug lub sab nyam, hab ua tej num kws nwg muab tso tsua kuv ua lawm kuas tav.

35 Mej pheej has tas, tshuav plaub hlis le txug caij hlais nplej. Kuv qha tsua mej has tas, mej ca le tsaa muag saib tej teb npleg saib. Nplej tub sav kug zoo hlais lawm. 36 Tug kws hlais saamswm tau nqe zug, hab tej kws nwg sau ca lawm yuav tau txujsa ntev moog ib txhws tsw kawg. Yeej yuav muaj le nuav, mas tug kws cog hab tug kws hlais txha zoo sab kawg nkaus le. 37 Lu lug kws has tas, muaj ib tug cog, muaj dua ib tug hlais, lu lug ntawm muaj tseeb tag. 38 Kuv tub khaiv mej moog hlais daim nplej kws tsw yog mej nqeg daag nqeg zug ua. Daim nplej hov yog lwm tug ua, kuas mej tau sau tej kws yog luas tug zug ua.

39 Cov tuabneeg Xamali kws nyob huv lub moos ntawm muaj ntau leej ntseeg Yexu vem tug quaspuj

ntawm qha tsua puab has tas, Yexu qha ib puas tsaav yaam kws nwg tau ua lawm huvsw tsua nwg noog. 40 Thaus cov tuabneeg Xamali tuaj cuag Yexu, puab cheem Yexu nrug puab nyob. Tes Yexu txawm moog nyob huv puab lub moos tau ob nub.

41 Muaj dua ntau leej lug ntseeg Yexu, tsua qhov puab tau nov tej lug kws Yexu qha. 42 Puab has tsua tug quaspui ntawm has tas, nwnuav peb ntseeg, tsw yog vem tej lug kws koj has, kuas peb ntseeg vem peb tau nov nwg tej lug, hab peb paub has tas, nwg yog nplajteb tug Cawmseej tag.

Yexu khu ib tug num tug tub

43 Thaus dhau ob nub hov lawm Yexu moog peg Kalilai tebchaws, 44 tsua qhov Yexu yeej ib txwm has tsua suavdawg has tas, tej tuabneeg ob caag puav leej fwm tug xwbfbw kws cev Vaajtswv lug, tsuas yog tej tuabneeg kws nyob huv nwg teb nwg chaw txha tsw fwm nwg xwb. 45 Thaus Yexu moog txug peg Kalilai tebchaws suavdawg tawm tuaj tog Yexu, tsua qhov thaus cov tuabneeg ntawm moog ua kevcai hlaa dhau nraag lub nroog Yeluxalee puab pum ib puas tsaav yaam kws Yexu ua nraag.

46 Yexu rov moog huv lub zog Khana kws nyob huv Kalilai tebchaws. Lub zog ntawm yog lub kws yaav tom ntej Yexu muab dej lug txa ua kua txwv maab xwv. Muaj ib tug num nyob huv lub moos Kapena-oo, nwg tug tub mob heev. 47 Thaus nwg nov has tas, Yexu tuaj nraag Yutai tebchaws tuaj txug huv Kalilai tebchaws lawm, nwg txawm tuaj thov Yexu moog paab khu nwg tug tub kws mob heev

heev tub yuav tuag peg tsev. 48 Yexu has tsua tug num ntawm has tas, yog mej tsw pum tej txujci tseem ceeb mej yeej yuav tsw ntseeg kuv tej lug le. 49 Tug num ntawm has tsua Yexu has tas, xwbfwb, tsheem kuv tug tub tseem tsw tau tuag thov koj moog paab khu lauj. 50 Yexu has tsua tug num ntawm has tas, koj ca le rov moog tsev, koj tug tub yeej tsw tuag le. Tug num ntawm ntseeg Yexu tej lug, nwg txawm ca le rov moog tsev. 51 Thaus nwg saamswm rov moog, nwg cov tub qhe tuaj lawv nwg. Puab tuaj has tsua nwg has tas, txwv, koj tug tub zoo lawm lauj. 52 Tug num hov txawm nug puab has tas, thaus twg kuv tug tub zoo lawm. Puab teb has tas, naag thaus taav su dua mivntswv koj tug tub txawm zoo lawm. 53 Tug mivtub txwv txawm ncu dheev txug has tas, lub swmhawm hov tub yog lub swmhawm kws Yexu has tsua nwg has tas, koj tug tub yeej tsw tuag le. Tub yog vem le ntawm tug num hab nwg tsev tuabneeg txha le lug ntseeg Yexu.

54 Txwj thaus Yexu tuaj nraag Yutai tebchaws tuaj txug huv Kalilai tebchaws nwg ua txujci tseem ceeb ob zag tsua zag nuav.

Yexu khu yawm kws tuaj pw ntawm paag dej

**5** Dhau hov ntawm, thaus txug lub caij kws cov Yutai ua kevcai, Yexu moog nraag lub nroog Yeluxalee. 2 Nyob huv lub nroog Yeluxalee muaj ib lub paag dej nyob ze ze ntawm rooj loog yaa. Muaj tswb lub tsev xuas luab vej lub paag dej hov. Qhov chaw hov lug Heplais hu ua Npexatha. 3 Muaj ib co tuabneeg mob coob coob tuaj pw huv cov tsev xuas luab hov. Tug dig muag los muaj,

tug ceg tawv los muaj, tug tuag teg tuag taw los muaj. (Puab tuaj nyob ntawm tog saib thaus twg lub paag dej ndaas, 4 vem yog Vaajtswv ib tug tubkhai sau ntuj pheej lug du lub paag dej hov. Thaus lub paag dej ndaas tes yog leejtwg xub nqeg moog daa ua ntej tes tug ntawm tej mob txawm ca le zoo hlo.) 5 Muaj ib tug txwv neej mob tau peb caug yim xyoo lug lawm, nwg tuaj pw ntawm lub paag dej hov hab. 6 Yexu pum nwg pw ntawm, Yexu paub has tas, nwg tub mob tau ntev lug lawm, Yexu txawm has tsua nwg has tas, koj xaav zoo los tsw xaav. 7 Nwg teb Yexu has tas, xwbfbw thaus dej ndaas tsw muaj leejtwg coj kuv nqeg tsua huv paag dej. Thaus kuv saamswm yuav nqeg tsua huv tes tub muaj lwm tug nqeg ua kuv ntej tsua huv lawm. 8 Yexu has tsua nwg has tas, koj ca le sawv tseeg muab koj daim lev dov nqaa ais moog. 9 Tes taamswm ntawm nwg tug mob txawm ca le zoo hlo. Nwg khaws nkaus nwg daim lev nqaa tshawb nyo taug kev lawm.

Nub ntawm yog nub su. 10 Cov Yutai has tsua tug yawm kws mob zoo hov has tas, nub nua yog nub su, koj nqaa koj daim lev le kos, koj ua txhum peb kevcai lawm lais. 11 Nwg teb puab has tas, tug kws khu kuv zoo has tsua kuv has tas, koj ca le muab koj daim lev dov nqaa ais moog. 12 Puab rov nug tug txwv neej hov has tas, tug kws kuas koj muab koj daim lev dov nqaa ais moog, yog leejtwg. 13 Kuas tug txwv neej ntawm tsw paub sov tug kws khu nwg yog leejtwg, tsua qhov Yexu pum muaj tuabneeg tuaj coob coob tsua ntawm, tes Yexu tub moog tsua lwm qhov lawm.

14 Dhau hov ntawm Yexu moog pum tug txwv neej

nuav huv lub tuam tsev thov Vaajtswv. Yexu has tsua nwg has tas, nwnuav koj tub zoo lawm, koj tsw xob rov ua txhum dua, tsaam tes koj yuav raug kev txom nyem heev dua qhov qub. 15 Tug txwv neej hov txawm rov qaab moog qha cov Yutai has tas, tug kws khu kuv zoo lawm yog Yexu. 16 Vem le ntawm cov Yutai txha tuav huv yuav tswm txom Yexu, vem nub kws Yexu khu tug txwv neej hov yog nub su.

17 Yexu qha puab has tas, kuv txwv tseem naj nub ua num. Yog le ntawm kuv yeej yuav tsum ua num hab. 18 Thaus cov Yutai nov Yexu has le ntawm puab yimfuab xaav muab Yexu tua pov tseg, tsua qhov puab pum tas, tsw yog Yexu ua txhum nub su kevcai xwb, kuas Yexu tseem khaav has tas, Vaajtswv yog Yexu txwv. Yexu has le ntawm yog Yexu tsaab ua luj yaam nkaus le Vaajtswv ntaag.

Leej tub yog tug kws muaj fwjchim

19 Yexu has tsua puab has tas, kuv qha tseeb tsua mej has tas, leej tub nwg yeej tsw ua ib yaam daabtsw lawv le nwg lub sab. Nwg tsuas ua tej kws nwg pum nwg txwv ua xwb. Tej kws leej txwv ua leej tub txha le ua, 20 tsua qhov leej txwv hlub nwg leej tub hab nwg qha ib puas tsaav yaam kws nwg ua tsua leej tub, hab tseem yuav qha tej kws luj dua tej nuav tsua leej tub ua, mas tej hov yuav ua tsua mej xaav tsw thoob le. 21 Leej tub yuav pub txujsa tshab tsua cov tuabneeg kws nwg pum zoo pub tsua, ib yaam le leej txwv tsaa cov tuabneeg kws tuag lawm sawv huv qhov tuag rov qaab lug. 22 Leej txwv tsw yog tug kws txav txem, kuas nwg tsaa leej tub ua tug kws



muaj fwjchim txav txem. 23 Leej txwv ua le ntawm kuas suavdawg fwm leej tub ib yaam le fwm leej txwv. Tug kws tsw fwm leej tub tug ntawm yeej tsw fwm leej txwv kws khaiv leej tub lug.

24 Yexu has tas, kuv qha tseeb tsua mej has tas, tug kws noog kuv lug hab ntseeg tug kws khaiv kuv lug, tug ntawm muaj txujsa ntev moog ib txhws tsw kawg, nwg yuav tsw raug txem vem nwg tub hlaa dhau lub qhov tuag lug tau txujsa lawm. 25 Kuv qha tseeb tsua mej has tas, muaj ib nub twg cov tuabneeg kws tuag lawm yuav nov Vaajtswv tug tub lub suab hu. Tes txhua tug kws nov yuav caj rov qaab lug. Nwgnuav tub txug nub ntawm lawm. 26 Leej txwv tsaa leej tub ua lub hauv paug txujsa ib yaam le leej txwv yog lub hauv paug txujsa. 27 Leej txwv tsaa leej tub ua tug kws muaj fwjchim txav txem, tsua qhov nwg tug tub yog Tuabneeg Leej Tub. 28 Mej tsw xob poob sab tsua tej lug kws kuv has nuav, vem tub yuav txug nub kws cov tuabneeg tuag tsua huv nruab deg nruab aa lawm nov Vaajtswv tug tub lub suab hu, 29 txhua tug yuav tawm huv qhov tuag rov qaab lug. Vaajtswv yuav tsaa cov tuabneeg kws ua zoo hab cov kws ua phem huv tuab sw sawv rov qaab lug. Cov tuabneeg kws ua zoo yuav sawv lug tau txujsa ntev moog ib txhws tsw kawg, kuas cov tuabneeg kws ua phem yuav sawv lug raug txem.

### Yexu yog Vaajtswv khaiv lug

30 Thaus kuv txav txem kuv yeej tsw tau ua lawv le kuv lub sab, kuv txav lawv le Vaajtswv kuas kuv ua xwb. Yog le ntawm kuv yeej txav txem ncaaj nceeg, kuv tsw ua lawv le kuv lub sab nyam,

kuv ua lawv le tug kws khaiv kuv lug lub sab nyam xwb.

31 Yog kuv rov qhuas kuv, tes yeej tsw muaj tuabneeg yuav ntseeg tej lug kws kuv has.

32 Kuas yeej muaj ib tug qhuas kuv. Kuv paub has tas, tej kws tug ntawm has nwg has tseeb.

xwb. 33 Mej khaiv mej tej tuabneeg moog cuag. Yauhaa kws coj tuabneeg ua kevcai raus dej.

Yauhaa has txug kuv has tas, tej lug kws kuv has puav leej tseem ceeb. 34 Kuv has le nuav tsw

yog kuv kuas tuabneeg qhuas kuv, kuas kuv xaav kuas mej dim mej lub txem. 35 Yauhaa zoo le lub

teeb kws luas taws ci ntsaa quas ab. Mej zoo sab ib nyuas ntu tsua qhov mej tau lug nyob huv

qhov kaaj hov lawm. 36 Kuv muaj ib yaam kws qha kuv tsua luas paub tseeb dua le kws Yauhaa qha,

qhov ntawm tub yog kuv teg num. Tej num hov yog leej txwv muab tso tsua kuv ua. Tej num

nuav tub ua tsua mej paub tseeb has tas, kuv yog tug kws leej txwv khaiv lug. 37 Leej txwv kws

khaiv kuv lug, nwg kuj ua tim khawv has txug kuv hab. Mej yeej ib txwm tsw tau nov nwg lub suab

hab tsw tau pum nwg lub ntsej muag. 38 Mej tsw noog nwg lug vem mej tsw ntseeg tug kws nwg

khaiv lug, tej lug. 39 Mej kawm Vaajtswv phoo ntawv, tub yog mej vaam has tas, yuav nrhav tau

txujsa ib txhws tsw kawg huv phoo ntawv hov. Vaajtswv phoo ntawv tub yog has txug kuv ntaag.

40 Ua caag mej tseem tsw kaam lug cuag kuv, sub mej txha tau txujsa ntev moog ib txhws tsw kawg.

41 Txawm yog muaj tuabneeg yuav qhuas kuv tsw qhuas los kuv yeej tsw quav ntsej le. 42 Kuv paub has tas, mej yeej tsw noog Vaajtswv lug.

43 Kuv yog tug kws leej txwv khaiv lug, kuas mej tsw leeg yuav kuv. Kuas tug kws tsw muaj leej-twg khaiv, nwg lug nwg xwb, mej tsua leeg yuav nwg. 44 Mej ib leeg nyam ua tsua ib leeg qhuas, kuas tsw muaj ib tug ua tsua Vaajtswv qhuas. Yog le ntawm mej yuav ua le caag ntseeg tau kuv tej lug. 45 Txawm yog le caag los xwj, mej tsw xob xaav has tas, kuv yuav kom mej tsua kuv txwv. Kuv yeej tsw ua le ntawm. Kuas tug Mauxe kws mej ca sab tsua yuav kom mej tsua kuv txwv. 46 Yog mej ntseeg Mauxe tej lug tag tag, mej yeej yuav ntseeg kuv, tsua qhov tej lug kws Mauxe sau puav leej has txug kuv. 47 Mej tub tsw ntseeg tej lug kws Mauxe sau, ais mej yuav ua le caag ntseeg tau kuv tej lug.

Yexu pub mov tsua tswb txheeb leejnoj  
(Mth 14:13-21, Mlk 6:30-44, Lk 9:10-17)

**6** Dhau hov ntawm Yexu rov qaab caij nkoj hlaa hav txwv Kalilai moog saab tim u. Lub hav txwv ntawm muaj dua ib lub npe hu ua Tinpela. 2 Muaj tuabneeg coob coob lawv Yexu qaab moog, vem puab pum Yexu muaj fwjchim khu tau tej mob zoo. 3 Yexu nce moog peg roob, nwg nrug nwg cov thwjtim nyob ua ke. 4 Thaus hov tub yuav txug lub caij kws cov Yutai ua kevcai hlaa dhau. 5 Yexu tsaa muag saib nwg pum muaj tuabneeg coob coob tuaj cuag nwg. Nwg txawm has tsua Fili has tas, peb yuav moog yuav mov hov twg txha le txaus suavdawg noj. 6 Nwg has le nuav swm saib Fili yuav teb le caag. Yexu tub xub paub ua ntej has tas, Yexu yuav ua daabtsw. 7 Fili teb has tas, txawm yog muab plaub txheeb npam moog yuav mov tsua suavdawg noj los ntshai ib leeg tsuas tau ib nyuas kaug miv miv xwb. 8 Muaj ib tug thwjtim

npe hu ua Aatali, nwg yog Ximoo Pestus tug kwv, nwg has tsua Yexu has tas, 9 muaj ib tug miv-tub nyob ntawm nuav muaj tswb lub ncuav hab ob tug ntseg, kuas yuav ua le caag tsaus suavdawg noj. 10 Yexu has tas, ca le kuas suavdawg nyob quas tsawg. Thaa j chaw kws puab nyob ntawm muaj muaj nyom, suavdawg txawm nyob quas tsawg. Suav cov txwv neej kws nyob ntawm kwv laam muaj tswb txheeb leej. 11 Yexu muab cov ncuav ntawm lug ua Vaajtswv tsaug. Thaus nwg ua Vaajtswv tsaug taag nwg muab faib tsua suavdawg noj. Nwg muab ob tug ntseg lug ua ib yaam nkaus le ntawm hab. Leejtwg yuav noj ntau npaum le caag los tau le. 12 Thaus suavdawg noj tsau lawm, Yexu txawm has tsua Yexu cov thwjtim has tas, mej ca le moog khaws tej kws suavdawg noj tsw taag, tsw xob ua ib qho xuum le. 13 Puab txawm moog khaws tej ncuav seem kws suavdawg noj tsw taag tau kaum ob tawb npoob miv puv nkaus.

14 Cov tuabneeg kws pum Yexu ua zag txujci tseem ceeb nuav txawm has tas, tug nuav yog tug xwbfbw cev Vaajtswv lug, kws has tas yuav lug huv nplajteb nuav tag tag le lauj. 15 Thaus Yexu paub has tas, suavdawg yuav tuaj muab nwg tsaa ua vaaj ntxwv, tes nwg tuab leeg txawm nce moog tsua peg roob lawm.

Yexu moog kwtaw sau nplaim dej  
(Mth 14:22-33, Mlk 6:45-52)

16 Thaus yuav tsaus ntuj Yexu cov thwjtim moog nraag ntug hav txwv. 17 Puab nce tsua huv nkoj, caij hlaa hav txwv moog tim lub moos Kapena-oo. Thaus tsaus ntuj lawm Yexu tseem tsw tau lug peg roob lug. 18 Mas muaj cua daaj

cua dub ntsawj dej ndaas cuag le daabtsw. 19 Cov thwjt看 tim tub nkuam nkoj moog tswb rau kislus kev lawm, puab pum Yexu lug kwtaw sau nplaim dej lug ze quas zug puab lub nkoj. Puab ntshai kawg le. 20 Kuas Yexu has tsua puab has tas, mej tsw xob ntshai tub yog kuv ntaag. 21 Thaus puab nov Yexu has le hov, puab txha zoo sab ca Yexu nce tsua huv puab lub nkoj. Tes taamswm hov lub nkoj moog txug ncua tim qhov chaw kws puab yeej yuav moog.

### Muaj tuabneeg moog nrhav Yexu

22 Thaus kaaj ntug cov tuabneeg coob coob ntawm tseem nyob saab ntug hav txwv tim u. Puab pum tuab lub nkoj nyob ntawm xwb. Puab paub has tas, Yexu yeej tsw nrug cov thwjt看 tim caij nkoj moog, puab tsuas pum cov thwjt看 tim caij moog xwb. 23 Muaj dua ob peb lub nkoj tuaj tim lub moos Tinpela tuaj nreg ntawm qhov chaw kws Yexu muab ncuaav lug ua Vaajtswv tsaug hab muab faib tsua suavdawg noj, 24 thaus cov tuabneeg coob coob hov saib ua cav tsw pum Yexu hab Yexu cov thwjt看 tim nrug puab nyob ua ke ntawm lawm, puab txawm ca le nce nkoj caij moog nrhav Yexu tim lub moos Kapena-oo.

### Yexu yog cov mov kws cawm txujsa

25 Thaus cov tuabneeg hov moog nrhav tau Yexu saab hav txwv tim u lawm, puab txawm has tsua Yexu has tas, xwbfbw, thaus twg koj txawm swv tuaj txug tim nuav lawm. 26 Yexu teb has tas, kuv qha tseeb tsua mej has tas, tub yog kuv pub mov tsua mej noj tsau mej txha le tuaj nrhav kuv,

tsw yog vem mej pum tej txujci tseem ceeb kws kuv ua. 27 Mej tsw xob nrhav tej mov kws txawj lwj, kuas mej yuav tsum nrhav tej mov kws tsw txawj lwj. Tej mov ntawm yog tej kws yuav cawm tau txujsa ntev moog ib txhws tsw kawg kws Tuabneeg Leej Tub yuav pub tsua mej. Tsua qhov Vaaajtswv kws yog mej leej txwv nwg tub qha tsua suavdawg paub lawm has tas, Tuabneeg Leej Tub ua hum nwg sab. 28 Puab txawm nug Yexu has tas, peb yuav tsum ua le caag peb txha ua tau Vaaajtswv tej num. 29 Yexu teb puab has tas, tej num kws Vaaajtswv xaav kuas mej ua yog le nuav, mej ca le ntseeg tug kws Vaaajtswv khaiv lug. 30 Puab has tsua Yexu has tas, yog le ais koj yuav ua yaam txujci tseem ceeb twg tsua peb saib txha txaus peb ntseeg koj. 31 Thau u peb puj koob yawm koob noj \*mana tom tebchaws moj saab qhua, lawv le muaj lug sau ca tsua huv Vaaajtswv phoo ntawv has tas,

nwg muab tej mov kws lug sau ntuj lug tsua puab noj.

32 Yexu has tsua puab has tas, kuv qha tseeb tsua mej has tas, tsw yog Mause pub cov mov kws lug sau ntuj lug tsua mej noj. Yog kuv txwv pub tej mov kws lug sau ntuj lug tsua mej noj. 33 Tug kws lug sau ntuj lug cawm tuabneeg nplaj-teb txujsa nwg yog cov mov ntawm. 34 Puab thov Yexu has tas, xwbfbw thov koj muab cov mov ntawm tsua peb noj moog le. 35 Yexu has tsua puab has tas, kuv yog cov mov kws cawm tuabneeg txujsa. Tug kws lug cuag kuv nwg yuav tsw tshaib ib zag le. Tug kws ntseeg kuv tej lug mas nwg yuav tsw nqhes le lawm.



36 Kuv tub has tsua mej has tas, txawm yog mej pum kuv los mej tsw ntseeg kuv. 37 Txhua tug kws kuv txwv pub tsua kuv yeej yuav lug cuag kuv. Hab txhua tug kws lug cuag kuv, kuv yeej los yuav huvsw, 38 vem kuv lug sau ntuj lug, tsw yog lug ua lawv le kuv lub sab, kuas yog kuv lug ua lawv le tug kws khaiv kuv lug lub sab nyam. 39 Tug kws khaiv kuv lug, nwg kuas kuv saib cov tuabneeg kws nwg tub muab pub tsua kuv lawm, tsw xob ca ib tug plu j le. Hab thaus txug nub kawg nwg kuas kuv tsaa cov tuabneeg ntawm sawv huv qhov tuag rov qaab lug. 40 Kuv txwv xaav kuas txhua tug kws pum lee j tub hab ntseeg lawm muaj txuj sa ntev moog ib txhws tsw kawg. Thaus txug nub kawg kuv yuav tsaa puab sawv huv qhov tuag rov qaab lug.

41 Cov Yutai txawm ywg ywg Yexu tsua qhov kws Yexu has tas, nwg yog cov mov kws lug sau ntuj lug. 42 Puab txawm has tas, tug nuav tub yog Yauxej tug tub los sas. Peb puav lee j paub nwg nam nwg txwv huvsw ne. Ua caag nwg laam has tas, nwg lug sau ntuj lug nua. 43 Yexu teb puab has tas, mej tsw xob ywg ywg le kos. 44 Yeej tsw muaj ib tug yuav lug cuag tau kuv, tsuas yog lee j txwv kws khaiv kuv lug nwg co j lee j twg lug, tes lee j twg txha lug cuag tau kuv xwb. Thaus txug nub kawg kuv yuav tsaa tug ntawm sawv huv qhov tuag rov qaab lug. 45 Cov xwb fwb cev Vaaj- tswv lug sau ca has tas,

Vaaj tswv yuav qha suavdawg huvsw.

Txhua tug kws tig qhov ntsej noog lee j txwv tej lug, hab kawm tej kws lee j txwv qha, yeej yuav

lug cuag kuv. 46 Kuv has le nuav tsw yog kuv has tas, suavdawg puav leej pum Vaajtswv, tsuas yog tug kws Vaajtswv khaiv lug txha pum xwb.

47 Kuv qha tseeb tsua mej has tas, tug kws ntseeg kuv, tug hov tub muaj txujsa ntev moog ib txhws tsw kawg lawm. 48 Kuv yog cov mov kws cawm txujsa. 49 Txawm yog mej puj koob yawm koob tau noj mana tom tebchaws moj saab qhua los puab puav leej tuag huvsw lawm. 50 Kuas tug kws noj cov mov kws lug sau ntuj lug tug ntawm yuav tsw tuag. 51 Kuv yog cov mov kws lug sau ntuj lug cawm txujsa. Tug kws noj cov mov nuav nwg yuav muaj txujsa ntev moog ib txhws tsw kawg. Cov mov kws cawm tau tuabneeg nplajteb txujsa hov, tub yog kuv cev nqaj ntaag.

52 Thaus cov Yutai nov Yexu has le ntawm puab sws caav has tas, tug txwv neej nuav yuav ua le caag muab tau nwg cev nqaj tsua peb noj. 53 Yexu has tsua puab has tas, kuv qha tseeb tsua mej has tas, yog mej tsw noj Tuabneeg Leej Tub cev nqaj hab tsw haus nwg cov ntshaav, tes mej yeej yuav tsw caj sa. 54 Tug kws noj kuv cev nqaj hab haus kuv cov ntshaav tug hov txha muaj txujsa ntev moog ib txhws tsw kawg. Thaus txug nub kawg kuv yuav tsaa nwg sawv huv qhov tuag rov qaab lug. 55 Tsua qhov kuv cev nqaj yog cov tseem mov. Kuv cov ntshaav yog cov tseem dej huv kws haus. 56 Tug kws noj kuv cev nqaj hab haus kuv cov ntshaav, mas nwg nrug kuv koom ua ib txujsa hab kuv nrug nwg koom ua ib txujsa. 57 Leej txwv kws khaiv kuv lug yog tug kws muaj txujsa. Vem kuv nrug nwg koom ib txujsa kuv txha le muaj txujsa. Yog le hov tug kws noj kuv cev nqaj tug ntawm

muaj txujsa tsua qhov kuv yog tug kws muaj txuj-  
sa. 58 Cov mov nuav yog cov kws lug sau ntuj  
lug, tsw yog cov kws mej tej puj koob yawm koob  
kws tuag taag lawm tau noj. Tug kws noj cov mov  
kws kuv has nuav, tug hov yuav muaj txujsa ntev  
moog ib txhws tsw kawg. 59 Tej nuav yog Yexu qha  
huv lub tsev sablaaj kws nyob huv lub moos Kapena-  
oo.

### Tej lug kws cawm tuabneeg txujsa

60 Thaus Yexu cov thwjtim nov Yexu has le hov  
muaj ntau leej txawm has tas, tej lug nuav peb  
ceblaaj to taub ua luaj le, leejtwg yuav paub  
txhais. 61 Yexu paub has tas, cov thwjtim ywg  
ywg tej lug kws Yexu has, Yexu txawm nug puab  
has tas, tej lug kws kuv has ntawm ua tsua mej  
poob sab los. 62 Yog le ntawm, yog mej pum Tuab-  
neeg Leej Tub rov moog nyob sau qhov chaw kws  
nwg yeej ib txwm nyob lug lawm, mej tsua yuav  
xaav le caag. 63 Vaajtswv tug Ntsuj Plig ua tau  
tsua tuabneeg caj sa, kuas cev nqaj daim tawv  
yeej ua tsw tau le ntawm. Tej lug kws kuv has  
tsua mej lawm muaj Vaajtswv Ntsuj Plig hab muaj  
txujsa. 64 Txawm yog le ntawm los mej cov tseem  
muaj qee leej tsw ntseeg kuv tej lug. Thaus chiv  
thawj Yexu tub xub paub has tas, Yexu cov thwj-  
tim tug twg yuav tsw ntseeg nwg, hab tug twg  
yuav faav xeeb tsua nwg. 65 Hab Yexu has tas,  
tub yog vem le nuav kuv txha has tsua mej has  
tas, yeej tsw muaj leejtwg yuav lug cuag tau kuv  
tsuas yog tug kws kuv txwv ua num tsua huv lub  
sab txha lug cuag tau kuv xwb.

66 Vem le ntawm Yexu cov thwjtim muaj ntau

leej txha tsw kaam ua Yexu le thwjtim lawm.  
 67 Yexu has tsua Yexu kaum ob leeg thwjtim has  
 tas, mej ne. Mej xaav tso kuv tseg hab los.  
 68 Ximoo Pestus teb Yexu has tas, tug tswv, yog  
 peb tso koj tseg lawm, peb yuav moog nrhav leej-  
 twg ua peb tug tswv. Tsuas yog koj tuab leeg  
 tej lug txha cawm tau kuas tuabneeg muaj txujsa  
 ntev moog ib txhws tsw kawg. 69 Nwgnuav peb  
 ntseeg hab peb paub tseeb has tas, koj yog tug  
 zoo kawg nkaus kws Vaajtswv khaiv lug. 70 Yexu  
 has tsua puab has tas, kuv tsw tau xaiv mej  
 kaum ob leeg huvsw los. Kuas mej cov muaj ib  
 tug nam yog daab. 71 Yexu has le ntawm, yog has  
 txug Ximoo Ikhalau tug tub Yuta. Yuta tub yog  
 Yexu ib tug thwjtim los nwg tseem yuav faav xeeb  
 tsua Yexu.

### Yexu hab Yexu cov kwv

**7** Dhau hov ntawm Yexu moog moog lug lug huv  
 Kalilai tebchaws xwb, nwg tsw xaav moog nraag  
 Yutai tebchaws, vem cov Yutai naj nub tuav huv  
 yuav muab nwg tua pov tseg. 2 Thaus yuav txug  
 lub caij kws cov Yutai ua \*kevcai ua tsev pheeb  
 suav, 3 Yexu cov kwv txawm has tsua Yexu has tas,  
 koj ca le moog lawm nraag Yutai tebchaws ais koj  
 cov thwjtim txha le pum tej txujci tseem ceeb  
 kws koj ua los maj. 4 Tug kws xaav tau ntsej muag  
 nwg yeej yuav ua nwg tej txujci tsua suavdawg  
 saib, nwg yeej tsw nyob nkaum quas nkoog huv  
 tsev xwb. Tej kws koj ua ntawm koj ca le ua  
 tsua tuabneeg nplajteb pum hab los maj. 5 Yexu  
 tub yog puab tug tijlaug los puab tseem tsw  
 ntseeg Yexu tej lug hab. 6 Yexu has tsua puab  
 has tas, tseem tsw tau txug kuv lub swmhawm,

kuas mej le mas lub swmhawm twg los yeej tau huvsw. 7 Tuabneeg nplajteb yeej tsw ntxub mej, kuas puab ntxub kuv tsua qhov kuv pheej qha puab tej kev txhum tsua puab. 8 Mej yuav moog ua kevcai los mej moog mej. Kuv tseem tsw tau moog, tsua qhov tseem tsw tau txug kuv swmhawm moog. 9 Thaus Yexu has le ntawm tsua puab taag, Yexu tseem nyob huv Kalilai tebchaws.

Yexu moog ua kevcai tsev pheeb suav

10 Thaus Yexu cov kwv ua ntej moog ua kevcai lawm, Yexu txawm lawv qaab moog hab. Kuas nwg tsw taab meeg moog, vem nwg tsw xaav kheev suavdawg pum nwg. 11 Thaus suavdawg saamswm ua kevcai cov Yutai pheej nrhav Yexu huv cov tuabneeg kws ua kevcai hov. Puab sws nug has tas, nwg nyob hov twg. 12 Suavdawg sws ntshw has txug nwg, muaj ib txha has tas, nwg yog tuabneeg zoo, muaj ib txha has tas, tsw yog, nwg yog tug kws ntxag suavdawg xwb. 13 Kuas tsw muaj ib tug muaj cuab kaav taab meeg pav txug Yexu le, tsua qhov puab ntshai cov Yutai.

14 Thaus suavdawg ua kevcai txug tog, Yexu moog qha huv lub tuam tsev thov Vaajtswv.

15 Thaus cov Yutai nov Yexu qha, puab xaav tsw thoob le. Puab has tas, nwg tub tsw tau kawm ntawv nas, ua caag nwg yuav txawj pav ua luaj le. 16 Yexu has tsua puab has tas, tej lug kws kuv qha nuav tsw yog kuv le lug, kuas yog Vaajtswv kws khaiv kuv lug tej lug xwb. 17 Tug kws zoo sab ua lawv le Vaajtswv lub sab nyam, tug ntawm yeej yuav paub has tas, tej lug kws kuv has nuav yog kuv has kuv xwb lossws yog Vaaj-

tswv kuas kuv has. 18 Tug kws xaav kuas luas qhuas nwg, nwg yeej laam tau laam has le nuav le u tsua luas qhuas. Kuas tug kws xaav kuas luas qhuas tug kws khaiv nwg lug, nwg yeej tsw daag, nwg yuav has tseeb xwb. 19 Mauxe tub yog tug kws qha Vaajtswv txuj kevcai tsua mej, kuas mej cov tub tsw muaj ib tug ua lawv le txuj kevcai hov le. Ua caag mej tseem yuav muab kuv tua pov tseg hab nua. 20 Suavdawg teb nplawg nta has tas, koj raug daab vwm lawm lauj. Leej-twg tau has tas, yuav muab koj tua pov tseg nua. 21 Yexu has tsua puab has tas, kuv tsuas ua tuab zag txujci tseem ceeb xwb, ua caag mej yuav xaav tsw thoob le. 22 Mauxe kuas mej muab mej tej mivnyuas ua kevcai txav. Txawm yog nub su los mej kuj muab ua hab. Mauxe yeej tsw yog tug kws xub qha mej ua kevcai txav. Mej puj koob yawm koob txha yog cov kws xub qha mej ua. 23 Mej yeej tsw xaav ua txhum Mauxe txuj kevcai mej txha le muab mej tej mivtub ua kevcai txav tsua nub su. Yog le ntawm ua caag nub su kuv khu ib tug txwv neej mob mej tseem chim tsua kuv hab. 24 Yog tsw muaj tseeb mej tsw xob laam tau laam thua j le nuav le u. Yog muaj tseeb tag mej le maav has.

### Yexu yog tug Cawmseej

25 Cov tuabneeg kws nyob huv lub nroog Yeluxalee muaj qee leej txawm has tas, tug txwv neej nuav tsw yog tug kws puab phee j nyaag yuav muab tua pov tseg los. 26 Mej swm saib nwg tub taab meeg qha suavdawg kuas tsw muaj ib tug muaj cuab kaav has le caag tsua nwg. Ntshai yog cov hlub puav leej paub has tas, nwg yog tug kws Vaajtswv



khaiv lug ua tug Cawmseej kaj. 27 Thaus tug Cawmseej lug yeej tsw muaj tuabneeg paub has tas, nwg lug hov twg lug. Kuas peb puav leej paub tug txwv neej nuav lub chaw nyob.

28 Thaus Yexu saamswm qha huv lub tuam tsev Yexu has nrov nrov tsua suavdawg has tas, mej yeej paub kuv hab paub kuv lub chaw nyob lawm tag lov. Kuas tsw yog kuv laam lug kuv. Yeej muaj ib tug khaiv kuv lug, nwg yog tug kws ncaaj nceeg. Mej tsw paub nwg, 29 kuas kuv paub nwg, tsua qhov nwg yog tug kws khaiv kuv lug. 30 Puab txawm yuav nteg Yexu, kuas tsw muaj leejtwg muaj cuab kaav nteg, tsua qhov tseem tsw tau txug lub swmhawm kws Vaajtswv teem ca. 31 Cov tuabneeg kws nyob ntawm muaj ntau leej txawm ntseeg Yexu tej lug. Puab has tas, thaus tug Cawmseej lug, nwg tseem yuav ua tej txujci tseem ceeb ntau dua le tug txwv neej nuav ua los.

### Cov tub rog yuav nteg Yexu

32 Thaus cov Falixai nov xuv has tas, tej pejxeem caav txug Yexu zum quas zawg, cov Falixai hab cov pov thawj hlub txawm khaiv ob peb tug tub rog moog nteg Yexu. 33 Yexu has tas, kuv yuav tsw nrug mej nyob ntev lawm, kuv yuav rov qaab moog cuag tug kws khaiv kuv lug. 34 Mej yuav nrhav kuv los yuav nrhav tsw tau, tsua qhov lub chaw kws kuv yuav moog ntawm mej moog tsw tau. 35 Cov Yutai txawm sws thaam has tas, nwg yuav moog hov twg ais peb yuav nrhav tsw tau nwg nua. Ntshai nwg yuav moog nrug cov Yutai kws nyob huv cov Kili tej moos nyob ua ke

hab qha cov Kili kaj, 36 nwg txha has tsua peb has tas, mej yuav nrhav kuv los yuav nrhav tsw tau, hab nwg has tas, lub chaw kws kuv yuav moog ntawm mej moog tsw tau. Tej lug kws nwg has ntawm nwg has txug daabtsw ne.

### Tug dej kws cawm txujsa

37 Nub kawg kws cov Yutai ua kevcai taag yog nub kws tseem ceeb kawg nkaus. Nub ntawm Yexu sawv quas ntsug pav nrov nrov tsua suavdawg has tas, tug kws nqhes dej ca le lug cuag kuv, kuv yuav muab dej tsua nwg haus. 38 Lawv le tub muaj lug sau ca tsua huv Vaaajtswv phoo ntawv has tas, tug dej kws cawm tuabneeg txujsa yuav txhawv huv tug kws ntseeg kuv lub sab lug.

39 Yexu has le ntawm tub yog has txug Vaaajtswv tug Ntsuj Plig kws Vaaajtswv yuav pub tsua cov kws ntseeg Yexu. Thaus Yexu has le ntawm Vaaajtswv tseem tsw tau khaiv Vaaajtswv tug Ntsuj Plig lug, vem Vaaajtswv tseem tsw tau tsaa Yexu ua tug kws muaj fwjchim kaav taag nrho ib puas tsaav yaam.

### Cov pejxeem tsw sws hum

40 Thaus cov pejxeem nov Yexu has le hov, muaj ntau leej txawm has tas, tug txwv neej nuav yog tug xwbfwb cev Vaaajtswv lug kws peb naj nub tog ntaag. 41 Muaj ib txha has tas, nwg tub yog tug kws Vaaajtswv khaiv lug ua tug Cawmseej ntaag. Kuas muaj ib txha has tas, tug Cawmseej yeej yuav tsw tuaj peg Kalilai tuaj ib zag le. 42 Tub muaj lug sau ca tsua huv Vaaajtswv phoo ntawv has tas, tug Cawmseej yog vaaj ntxwv

Tavi ib tug xeeb ntxwv, nwg yuav lug yug tsua  
 huv lub moos Pelehee kws yaav thau u Tavi nyob.  
 43 Yog le ntawm cov pejxeem txha le tsw sws hum  
 lawm. 44 Muaj qee leej xaav nteg Yexu, kuas tsw  
 muaj ib tug muaj cuab kaav nteg.

Yutai cov thawj tsw ntseeg Yexu tej lug

45 Cov tub rog rov qaab lug cuag cov pov  
 thawj hlub hab cov Falixai. Puab nug cov tub  
 rog has tas, ua caag mej tsw coj nwg lug. 46 Cov  
 tub rog teb has tas, yeej tsw muaj ib tug yuav  
 txawj has le tug hov has ib zag le. 47 Cov Fali-  
 xai txawm has tsua puab has tas, ham tsw yog mej  
 qaug nwg phuas cawv lawm hab loj. 48 Sub mej nim  
 nov has tas, peb cov thawj hab cov Falixai muaj  
 ib tug twg ntseeg nwg hab nua. 49 Vaajtswv foom  
 tsw zoo tsua cov nam tuabneeg kws tsw quav ntsej  
 Mause txuj kevcai lawm. 50 Cov Falixai hov muaj  
 ib tug npe hu ua Nikautemau. Ua ntej ntawm  
 Nikautemau tau moog nrug Yexu thaam ib zag. Nwg  
 has tsua puab has tas, 51 peb kevcai yeej qha  
 has tas, yog peb yuav teem txem tsua ib tug peb  
 yuav tsum xub nug nwg zoo zoo hab ca nwg lug has  
 daws nwg zaaj tsaiv le maav teem txem tsua nwg.  
 52 Puab teb has tas, koj tuaj peg Kalilai tuaj  
 hab kaj, koj txha has le kos. Koj ca le moog  
 ua tuab zoo nyeem Vaajtswv phoo ntawv zoo zoo  
 koj txha le pum tas, yeej tsw muaj ib tug xwbfbw  
 cev Vaajtswv lug yuav tuaj peg Kalilai tuaj hlo  
 le. (Tes puab nyag txawm rov moog nyag tsev  
 lawm.

Tug quaspuj kws ntxag hluas nraug

**8** Dhau hov ntawm Yexu nce moog peg roob ntoo txwv kav laaj. 2 Thaus kaaj ntug quas txoog Yexu rov moog nraag lub tuam tsev thov Vaaajtswv. Muaj tuabneeg coob coob tuaj cuag nwg, nwg txawm nyob quas tsawg qha suavdawg. 3 Cov xwbfbw qha Vaaajtswv kevcai hab cov Falixai caab ib tug quaspuj tuaj cuag Yexu. Puab nteg tau nwg thaus nwg saamswm ntxag hluas nraug. Puab kuas nwg sawv ntsug taab meeg suavdawg. 4 Puab kom nwg tsua Yexu has tas, xwbfbw, muaj tuabneeg nteg tau tug quaspuj nuav thaus nwg saamswm ntxag hluas nraug ntaag. 5 Mause sau ib txuj kevcai qha peb has tas, mej yuav tsum xuas pob zeb ntaus tug nam tuabneeg kws ua phem le nuav kuas tuag. Yog le ntawm saib koj yuav has le caag. 6 Puab has le nuav saib nrhav tau chaw kom Yexu los tsw tau. Kuas Yexu txawm nyo xuas ntiv teg sau sau huv aav. 7 Thaus Yexu pum tas, puab tseem pheej nug nug, Yexu txawm tsaa hau hlo has tsua puab has tas, mej cov kws nyob ntawm nuav, yog leejtwg tsw tau ua txhum le tes ca nwg xub xuas pob zeb ntaus tug quaspuj nuav. 8 Tes Yexu txawm rov nyo hau xuas ntiv teg sau sau huv aav dua. 9 Thaus puab nov Yexu has le ntawm puab txhua tug nyag ca le tswv nyag moog lawm, cov laug xub tswv ua ntej. Puab tswv taag huvsw, tshuav Yexu tuab leeg nrug tug quaspuj hov nyob xwb. 10 Yexu tsaa hau saib, Yexu has tsua tug quaspuj ntawm has tas, mivntxhais puab dua twg taag lawm. Tsw muaj leejtwg rau txem tsua koj los. 11 Nwg teb Yexu has tas, xwbfbw, tsw muaj leejtwg rau txem tsua kuv es. Yexu has tsua nwg has tas, yog le ntawm, kuv kuj tsw rau txem tsua koj hab. Koj ca le moog tsev, koj tsw xob rov

ua txhum dua ib zag le lawm.)

Yexu yog qhov kaaj kws pum kev

12 Yexu rov qha cov pejxeem has tas, kuv yog qhov kaaj kws ci tsua tuabneeg nplajteb pum kev. Tug kws nrug kuv moog nwg yuav tsw moog huv txujkev tsaus ntuj, nwg lub neej yuav tshaav ntuj quas lug le xwb. 13 Cov Falixai has tsua Yexu has tas, tej lug kws koj has kos tes tsuas yog koj rov qhuas koj xwb. Koj tej lug yeej tsw tseem ceeb daabtsw le. 14 Yexu teb has tas, txawm yog kuv rov qhuas kuv los kuv tej lug yeej tseem ceeb, tsua qhov kuv paub has tas, kuv lug hov twg lug, hab kuv yuav moog lawm hov twg. Kuas mej tsw paub sov kuv lug hov twg lug hab kuv yuav moog hov twg. 15 Mej thuaaj luas hab txav txem tsua luas lawv le mej laam xaav xwb. Kuv yeej tsw thuaaj leejtwg hab tsw txav txem tsua leejtwg. 16 Yog kuv thuaaj luas hab txav txem tsua luas los kuv tej lug yeej muaj hauv paug muaj ntsws xaus, tsua qhov tsw yog kuv tuab leeg has xwb, yog leej txwv kws khaiv kuv lug nwg nrug kuv has hab. 17 Tub muaj lug sau ca tsua huv mej txuj kevcai has tas, yog muaj ob tug ua tim khawv has ib yaam nkaus lawm 18 tes tej lug kws ob tug has yeej muaj tseeb tag. Kuv yeej ua kuv tug tim khawv. Leej txwv kws khaiv kuv lug kuj ua kuv tug tim khawv hab. 19 Puab txawm nug Yexu has tas, koj txwv nyob hov twg. Yexu teb has tas, mej yeej tsw tau paub kuv hab kuv txwv. Yog mej paub kuv tes mej yeej yuav paub kuv txwv hab.

20 Yexu has tej lug nuav huv lub tuam tsev thov Vaajtswv. Thaus ntawm nwg saamswm qha huv

chaav tsev kws puab tso tej swb xaab rau nyaj. Tsw muaj leejtwg muaj cuab kaav nteg nwg, tsua qhov tseem tsw tau txug lub swmhawm kws Vaaajtswv teem ca.

Cov muaj txem moog tsw tau qhov kws Yexu moog

21 Yexu has dua tsua puab has tas, kuv yuav moog. Mej yuav nrhav kuv, kuas mej yuav tuag tsua mej lub txem. Lub chaw kws kuv yuav moog ntawm mej moog tsw tau. 22 Cov Yutai txawm has tas, ntshai nwg yuav rov tua nwg pov tseg pauj, nwg txha has tas, lub chaw kws nwg yuav moog ntawm, peb moog tsw tau. 23 Yexu has tas, mej yog tuabneeg huv qaab ntuaj. Kuv yog tuabneeg qaum ntuaj. Mej yog tuabneeg nplajteb, kuv tsw yog tuabneeg nplajteb, 24 kuv txha has tsua mej has tas, mej yuav tuag tsua mej lub txem. Yog mej tsw ntseeg has tas, kuv yog tug kws kuv qha tsua mej hov, tes mej yuav tuag tsua mej lub txem huvsw. 25 Puab nug Yexu has tas, koj yog leejtwg. Yexu teb has tas, kuv yog tug kws kuv tub qha tsua mej thau chiv lub keeb lug lawm. 26 Tseem muaj ntau qhov kws kuv yuav kom mej hab thuaaj mej. Txawm yog le caag los xwj. Tug kws khaiv kuv lug yog tug kws ncaaj nceeg. Tej kws kuv qha tsua tuabneeg nplajteb, kuv tsuas qha lawv le tej kws nwg kuas kuv qha xwb.

27 Cov tuabneeg kws nov Yexu has le hov, puab tsw nkaag sab has tas, Yexu has txug leej txwv. 28 Yexu txawm has tsua puab has tas, thaus mej muab Tuabneeg Leej Tub teem tsua sau ntoo khaublig tes mej yuav paub has tas, kuv yog tug kws kuv qha tsua mej ntaag. Hab mej yuav paub has

tas, kuv tsw ua ib yaam daabtsw lawv le kuv lub sab, kuv tsuas has tej kws leej txwv qha tsua kuv lawm xwb. 29 Tug kws khaiv kuv lug nwg nrug kuv nyob. Nwg tsw tso kuv tseg ib zag le, tsua qhov kuv yeej ib txwm ua lawv le nwg lub sab nyam xwb. 30 Cov kws nov Yexu has le hov muaj ntau leej txawm ntseeg Yexu.

Txhua tug puav leej ua txujkev txhum qhev

31 Yexu has tsua cov Yutai kws ntseeg Yexu has tas, yog mej ua lawv le tej lug kws kuv qha, mej txha yog kuv cov thwjtim tag. 32 Mej yuav paub qhov tseeb, hab qhov tseeb ntawm yuav tso mej dim. 33 Puab teb has tas, peb yog Aplahaa cov xeeb ntxwv peb yeej tsw tau ua leejtwg qhev ib zag le. Lu lug kws koj has tas, mej yuav dim, yog koj has txug daabtsw. 34 Yexu has tsua puab has tas, kuv qha tseeb tsua mej has tas, txhua tug kws ua txhum, puab puav leej ua txujkev txhum qhev. 35 Tug tub qhe yeej yuav tsw nrug tug tswv tsev nyob moog ib swm neej. Tsuas yog tug tub txha nrug nwg nyob xwb. 36 Yog Vaajtswv leej tub tso mej dim tes mej yeej yuav dim tag. 37 Kuv paub has tas, mej yog Aplahaa cov xeeb ntxwv los mej tseem yooj xeeb yuav muab kuv tua pov tseg, tsua qhov mej tsw ntseeg tej lug kws kuv qha. 38 Kuv has lawv le tej kws kuv txwv qha tsua kuv, kuas mej ua lawv le tej kws mej txwv qha tsua mej.

Daab Ntxwg Nyooq yog mej txwv

39 Puab teb Yexu has tas, peb txwv yog Aplahaa. Yexu has tsua puab has tas, yog mej yog



Aplahaa le xeeb ntxwv tag, mej yeej yuav ua mej teg num zoo ib yaam le Aplahaa ua. 40 Kuas nwg-nuav mej xaav muab kuv tua pov tseg, vem yog kuv qha qhov tseeb kws Vaajtswv tub qha tsua kuv lawm tsua mej noog. Aplahaa yeej tsw tau ua le mej ua. 41 Mej ua ib yaam le mej txwv ua. Puab teb has tas, peb tsw yog mivnyuas tsaub. Peb muaj tuab leeg txwv xwb, peb txwv yog Vaajtswv. 42 Yexu has tsua puab has tas, yog Vaajtswv yog mej txwv tag, mej yeej yuav noog kuv lug, tsua qhov yog Vaajtswv khaiv kuv lug. Kuv lug nrug mej nyob ntawm nuav, tsw yog kuv lug kuv xwb, kuas yog Vaajtswv khaiv kuv lug. 43 Ua caag mej tsw nkaag sab tej lug kws kuv has nuav. Tog mej tsw nkaag sab los vem yog mej tsw xaav noog tej lug kws kuv qha. 44 Mej txwv yog Daab Ntxwg Nyoo. Mej txha nyam ua lawv le mej txwv lub sab. Txwj thau u lug Daab Ntxwg Nyoo yog tug kws tua tuabneeg. Nwg yeej tsw ua lawv le qhov tseeb, tsua qhov nwg tsw nyam qhov tseeb. Tej lug kws nwg has yog daag xwb, tsua qhov nwg yeej yog tug nam daag. Txhua lu lug daag puav leej tawm huv Daab Ntxwg Nyoo qhov ncauj lug. 45 Tub yog kuv has tseeb mej txha tsw ntseeg kuv tej lug. 46 Mej cov leejtwg pum tas kuv ua txhum. Tej lug kws kuv has kuv yeej has tseeb xwb, ua caag mej tsw ntseeg. 47 Tug kws yog Vaajtswv mivnyuas tug ntawm yeej noog Vaajtswv lug. Kuas mej yeej tsw yog Vaajtswv mivnyuas mej txha tsw noog Vaajtswv lug.

### Yexu xub nyob dua Aplahaa

48 Cov Yutai txawm teb Yexu has tas, lu lug kws peb has tas, koj yog tuabneeg Xamali hab koj

raug daab, tsw yog le peb has los. 49 Yexu has tsua puab has tas, kuv tsw raug daab. Kuv fwm kuv txwv kuas mej saib tsw taug kuv. 50 Kuv tsw tau kuas leejtwg fwm kuv, kuas muaj ib tug qha tuabneeg fwm kuv. Tug ntawm yuav rau txem tsua cov kws tsw fwm kuv. 51 Kuv qha tseeb tsua mej has tas, tug kws ua lawv le kuv tej lug, mas nwg yuav tsw tuag le. 52 Cov Yutai has tsua Yexu has tas, qhov kws koj has le kos tub ua tsua peb paub tseeb has tas, koj raug daab lawm lauj. Aplahaa hab cov xwbfbw cev Vaaajtswv lug tub tuag taag lawm, ua caag koj tseem yuav has tas, tug kws ua lawv le koj tej lug, tes yuav tsw tuag le nua. 53 Peb txwv Aplahaa tub tuag lawm. Koj tseem muaj fwjchim luj dua Aplahaa hab los. Cov xwbfbw cev Vaaajtswv lug tub tuag taag huvsw lawm hab. Koj xaav has tas, koj tswm txaj dua puab cov hov hab nua los. Ua caag koj yuav khaav ua luaj. 54 Yexu teb puab has tas, yog kuv rov qhuas kuv xwb, kuv tej lug yeej tsw muaj qaab-hau daabtsw le. Kuv txwv yog tug kws qhuas kuv, nwg yog tug kws mej hu has tas, mej tug Vaaajtswv. 55 Mej yeej tsw paub nwg, kuas kuv paub nwg. Yog kuv has tas, kuv tsw paub nwg, tes kuj yog kuv daag ib yaam le mej hab. Kuas kuv yeej paub nwg hab kuv ua lawv le nwg tej lug. 56 Mej txwv Aplahaa zoo sab kws nwg yuav pum nub kws kuv lug. Nwgnuav nwg tub pum lawm, nwg zoo sab kawg le. 57 Cov Yutai has tsua Yexu has tas, koj noob nyoog tub tsw tau muaj tswb caug xyoo ais ua caag koj laam has tas, koj pum Aplahaa nua. 58 Yexu teb has tas, kuv qha tseeb tsua mej has tas, thaus tseem tsw tau yug Aplahaa kuv yeej xub nyob lawm. 59 Puab txawm khaws pob zeb yuav ntaus Yexu, kuas Yexu tswv nraim hab tawm huv lub tuam tsev thov Vaaajtswv moog lawm.

Yexu khu tug yawm dig muag

**9** Thaus Yexu saamswn taug kev moog Yexu pum ib tug quasyawg dig muag. Nwg ib txwm dig muag thaus nruab thab lug. 2 Yexu cov thwjtim nug Yexu has tas, xwbfwb, leejtwg ua txhum es tug yawm nuav txha dig muag, nwg ua txhum los yog nwg nam nwg txwv ua txhum. 3 Yexu teb has tas, qhov kws nwg dig muag hov tsw yog vem nwg tej kev txhum lossws vem nwg nam nwg txwv kev txhum. Kuas yog nwg dig muag sub suavdawg txha pum Vaajtswv tug fwjchim. 4 Nwgnuav tseem yog nruab nub peb yuav tsum ua tug Vaajtswv kws khaiv kuv lug tej num. Tshuav tsw ntev yuav tsaus ntuj. Thaus tsaus ntuj lawm yuav tsw muaj tuabneeg pum kev ua num lawm. 5 Thaus kuv tseem nyob huv nplajteb nuav kuv yog qhov kaaj kws ci tsua tuabneeg nplajteb pum kev. 6 Thaus Yexu has le ntawm taag Yexu ntu qub ncaug tsua huv aav. Nwg muab du xyaw aav ua mivntswv aav nplaum, mas muab cov aav nplaum hov pleev tug dig muag ob saab qhov muag. 7 Yexu has tsua nwg has tas, koj ca le moog ntxuav muag tom lub paag dej Xilauya. Xilauya txhais has tas, khaiv moog. Tug dig muag moog ntxuav muag taag nwg rov qaab lug. Tes nwg tub pum kev lawm.

8 Tej tuabneeg zej zog hab tej tuabneeg kws pheej pum tug dig muag hov, thov khawv txawm sws nug has tas, tug nuav tsw yog tug kws naj nub nyob quas tsawg thov khawv los. 9 Muaj qee leej has tas, tub yog ntaag los maj. Kuas muaj qee leej has tas, tsw yog, yog nwg ntsej muag zoo thooj le tug dig muag u xwb. Tug dig muag kws pum kev lawm txawm has tas, kuv tub yog tug kws mej has kos ntaag. 10 Puab nug nwg has tas, ua

caag koj tsua pum kev lawm. 11 Nwg teb puab has tas, muaj ib tug txwv neej npe hu ua Yexu, nwg ua ib co aav nplaum pleev kuv ob lub qhov muag. Nwg has tsua kuv has tas, koj ca le moog ntxuav muag tom lub paag dej Xilauya, kuv txawm ca le moog ntxuav. Thaus kuv ntxuav taag kuv txawm ca le pum kev lawm. 12 Puab nug has tas, tug kws koj has kos nyob hov twg. Nwg teb puab has tas, kuv tsw paub as.

Cov Falixai nug tas ua caag tug dig muag pum kev

13 Puab txawm koj tug dig muag kws rov pum kev lawm moog cuag cov Falixai. 14 Nub kws Yexu ua mivntswv aav nplaum pleev tug dig muag hov ob saab qhov muag yog nub su. 15 Cov Falixai rov nug nwg has tas, ua caag koj tsua pum kev lawm. Nwg pav tsua puab noog has tas, tug hov muab mivntswv aav nplaum pleev kuv ob lub qhov muag. Tes kuv moog ntxuav muag taag kuv txawm pum kev lawm. 16 Cov Falixai muaj qee leej has tas, tug kws ua le nuav yeej tsw yog tug kws Vaajtswv khaiv lug, tsua qhov nub su nwg tsw su. Kuas muaj qee leej has tas, tug kws muaj txem yuav ua le caag ua tau tej txujci tseem ceeb nuav. Tes puab txawm tsw sws hum lawm.

17 Cov Falixai rov nug nwg dua ib zag has tas, koj has tas, tug hov ua tsua koj ob lub qhov muag pum kev nua koj swm qha tsua peb saib tug hov yog leejtwg. Nwg teb puab has tas, tug hov yog ib tug xwbfbw cev Vaajtswv lug. 18 Kuas cov Yutai tsw ntseeg tas, nwg yog ib tug dig muag kws tsua pum kev lawm. Puab txawm moog hu nwg nam nwg txwv tuaj. 19 Puab nug ob tug has tas, tug nuav

yog meb tug tub kws meb has tas, nwg yeej ib txwm dig muag thaus nruab thab lug los tsw yog, ua caag nwg nuav nwg tsua pum kev lawm. 20 Ob tug teb has tas, ib paub has tas nwg yog ib tug tub kws ib txwm dig muag thaus nruab thab lug tag, 21 kuas ib tsw paub sov ua caag nwg tsua pum kev lawm. Hab ib tsw paub sov leejtwg khu nwg ob lub qhov muag. Nwg tub tav hluas lawm mej ca le nug nwg, nwg txawj qha nwg tsua mej. 22 Ob tug ntshai cov Yutai ob tug txha has le ntawm, tsua qhov cov Yutai tub sablaaj has hum has tas, yog leejtwg leeg has tas, Yexu yog tug kws Vaajtswv khaiv lug ua tug Cawmseej tes puab yuav tsw kheev tug hov tuaj huv tsev sablaaj lawm. 23 Tub yog vem le nuav nwg nam nwg txwv txha has tas, nwg tub tav hluas lawm, mej ca le nug nwg.

24 Puab txawm rov hu nwg lug tsua ntawm puab dua ib zag. Puab has tsua nwg has tas, muaj Vaajtswv nyob sau ntuj pum, koj tsw xob npog ib yaam daabtsw le, koj ca le qha tseeb tseeb tsua peb. Peb yeej paub tas, tug ntawm yog tuabneeg muaj txem. 25 Tug dig muag kws tub pum kev lawm teb has tas, sov nwg muaj txem los tsw muaj kuv tsw paub, kuv tsuas paub tas, kuv yeej ib txwm dig muag, kuas nwg nuav kuv pum kev lawm xwb. 26 Puab rov nug has tas, nwg ua le caag tsua koj ais koj ob lub qhov muag txha pum kev. 27 Nwg teb puab has tas, kuv tub pav taag tsua mej lawm, kuas mej tsw noog. Ua caag mej tseem xaav kuas kuv rov pav tsua mej noog dua hab, ntshai mej xaav ua nwg cov thwjtim hab kaj. 28 Thaus puab nov nwg has le hov puab txawm tshev nwg has tas, koj yog tug nam tuabneeg ntawm le thwjtim,

kuas peb yog Mause le thwjt. 29 Peb paub tas, Vaajtswv nrug Mause thaam, kuas tug nam tuabneeg ntawm sov nwg tuaj hov twg tuaj peb yeej tsw paub. 30 Tug kws tub pum kev lawm teb paub has tas, kuv xaav tsw thoob le, sov ua caag mej tsw paub has tas nwg tuaj hov twg tuaj, kuas nwg tsua khu tau kuv ob lub qhov muag pum kev.

31 Peb paub has tas, Vaajtswv yeej tsw noog cov tuabneeg muaj txem tej lug, nwg tsuas noog cov kws fwm nwg hab ua lawv le nwg tej lug xwb.

32 Txwj thaus Vaajtswv tswm ntuj tswm teb lug tsw muaj leejtwg yuav nov has tas, muaj ib tug khu tau cov tuabneeg kws dig muag thaus nruab thab lug, pum kev le. 33 Yog tug ntawm tsw yog tug kws Vaajtswv khaiv lug nua, nwg yeej ua tsw tau le nuav hlo le. 34 Puab teb has tas, koj yog tug nyuas kaas tsaub kws nyav hlub nuav xwb ais ua caag koj yuav laam ntuag peb ua nyuas daag quas ntsuav le kos. Puab txawm ntab nwg tswv tawm huv lub tsev sablaaj moog.

#### Cov kws pum kev yuav dig muag

35 Yexu nov tas, puab ntab tug kws qhov muag pum kev lawm tawm huv tsev sablaaj lawm, tes Yexu txawm moog has tsua nwg has tas, koj ntseeg Tuabneeg Leej Tub los tsw ntseeg. 36 Nwg teb has tas, xwbfb, Tuabneeg Leej Tub yog tug twg. Thov koj qha tsua kuv, kuv txha paub ntseeg nwg. 37 Yexu has tsua nwg has tas, koj tub pum Tuabneeg Leej Tub lawm. Nwg yog tug kws saamswm nrug koj thaam ntaag. 38 Tug kws tub pum kev lawm txawm txhus caug ndua ntawm Yexu kwtaw has tas, tug tswv kuv ntseeg.

39 Yexu qha has tas, qhov kws kuv lug huv nplajteb nuav yog kuv lug txav txem. Kuv ua le nuav kuas cov tuabneeg dig muag pum kev, hab kuas cov tuabneeg pum kev dig muag. 40 Thaus cov Falixai kws nrug Yexu nyob ntawm nov Yexu has le hov muaj qee leej txawm has tsua Yexu has tas, koj has le kos, yog koj has tas, peb puav leej dig muag huvsw nua los. 41 Yexu teb puab tas, yog mej dig muag, yeej tsw muaj tuabneeg yuav has tas, mej muaj txem. Kuas mej has tas, mej yog cov kws pum kev. Yog le ntawm mej tseem muaj txem.

Zaaj pev lug has txug nkuaj yaaj

**10** Yexu has tas, kuv qha tseeb tsua mej tas, tug kws moog huv lub nkuaj yaaj, yog nwg tsw moog ntawm rooj nkuag moog, nwg ca le nce lwm qhov moog, tug ntawm tsw yog tug tswv, nwg yog tub saab tub nyag xwb. 2 Tug kws moog ntawm rooj nkuag moog txha yog tug tswv kws yug paab yaaj. 3 Tug kws zuv rooj nkuag yuav qheb tsua nwg. Thaus nwg cuab nwg paab yaaj tej npe, paab yaaj kuj paub nwg lub suab. Nwg coj nwg paab yaaj tawm huv nkuaj moog. 4 Thaus nwg coj paab yaaj tawm tsua saab nrau lawm nwg yuav moog ua paab yaaj ntej. Paab yaaj yuav lawv nwg qaab tsua qhov paab yaaj paub nwg lub suab. 5 Yaaj yuav tsw lawv lwm tug moog, yaaj yeej yuav tswv ntawm lwm tug moog, vem yaaj tsw paub lwm tug lub suab.

6 Yexu has zaaj pev lug nuav tsua puab noog kuas puab tsw to taub.



Yexu yog tug tswv kws yug yaaj

7 Yexu rov qaab has dua has tas, kuv qha tseeb tsua mej tas, kuv yog lub rooj nkuag yaaj.

8 Txhua tug kws ua kuv ntej tuaj puav leej yog tub saab tub nyag, mas paab yaaj tsw noog puab tej lug. 9 Kuv yog lub rooj nkuag, tug kws lug ntawm kuv moog tsua huv lub nkuaj, nwg yuav dim kev tuag. Nwg yuav moog moog lug lug, hab nwg yuav nrhav tau zaub noj. 10 Thaus tub saab tuaj tub saab tsuas tuaj nyag tuaj tua hab ua kuas puam tsuaj xwb. Kuas kuv lug yog lug ua kuas suavdawg tau txujsa ntev moog ib txhws tsw kawg.

11 Kuv yog tug tswv kws yug zoo. Tug kws yug zoo nwg yeej zoo sab tso nwg txujsa lug thij nwg paab yaaj. 12 Tug kws luas ndav zuv paab yaaj, nwg tsw yog tug tswv, paab yaaj tsw yog nwg le. Thaus nwg pum maa lug nwg ca le tso paab yaaj tseg tswv moog lawm. Maa ca le tum paab yaaj hab ua tsua paab yaaj tswv tawg taag lawm.

13 Nwg yog tug kws luas ndav xwb nwg txha tswv lawm, tsw txhawj txug paab yaaj. 14 Kuv yog tug tswv kws yug zoo. Kuv paub kuv paab yaaj hab kuv paab yaaj paub kuv, ib yaam le kuv txwv paub kuv hab kuv paub kuv txwv. 15 Kuv zoo sab tso kuv txujsa lug thij kuv paab yaaj. 16 Kuv muaj ib co yaaj kws tsw nyob huv lub nkuaj nuav hab. Kuv yuav tsum moog coj cov yaaj ntawm lug hab. Cov ntawm yuav noog kuv lug, kuv yuav moog sau lug nrug cov kws nyob huv nkuaj ua tuab paab hab koom tuab tug tswv.

17 Kuv txwv hlub kuv vem kuv zoo sab tso kuv txujsa tseg. Kuv ua le hov kuv txha tau kuv

txujsa rov qaab lug. 18 Tsw muaj leejtwg yuav txeeb tau kuv txujsa. Qhov kws kuv tso kuv txujsa tseg hov yog kuv tso kuv xwb tsw muaj leejtwg yuam kuv. kuv muaj peev xwm tso kuv txujsa tseg, hab kuv muaj peev xwm muab tau kuv txujsa rov qaab lug. Tub yog kuv txwv khaiv kuv lug ua le nuav.

19 Tej lug kws Yexu has nuav ua tsua cov Yutai rov tsw sws hum. 20 Muaj ntau leej has tas, nwg raug daab nwg vwm lawm lauj. Mej tseem yuav moog noog nwg tej lug ua daabtsw. 21 Kuas muaj qee leej has tas, tug tuabneeg kws raug daab yeej tsw txawj has le tug nuav has. Daab yuav ua le caag khu tau cov tuabneeg dig muag pum kev.

### Cov Yutai tsw ntseeg Yexu

22 Thaus txug lub caij ua \*kevcai thov Vaajtswv foom koob foom moov tsua lub tuam tsev, suavdawg txawm moog ua kevcai huv lub nroog Yeluxalee. 23 Lub caij ntawm yog lub caij ntuj no. Yexu moog moog lug lug huv lub tuam tsev zaaj qaab khaav Xalaumoo. 24 Cov Yutai kws tuaj nyob ntawm txawm lug has tsua Yexu has tas, thaus twg koj le qha tsua peb paub tseeb has tas, koj yog tug Cawmseej kws Vaajtswv khaiv lug los tsw yog nua. 25 Yexu teb has tas, kuv tub qha tsua mej lawm kuas mej tsw ntseeg kuv tej lug. Tej num kws kuv txwv kuas kuv ua, tub ua tsua mej paub tseeb lawm, 26 kuas mej tsw ntseeg, tsua qhov mej tsw yog kuv paab yaaj. 27 Kuv paab yaaj paub kuv tej lug. Kuv paub kuv paab yaaj, paab yaaj lawv kuv qaab. 28 Kuv muab txujsa ntev moog ib txhws tsw kawg tsua puab. Puab yuav tsw tuag le. Hab

tsw muaj leejtwg yuav txeeb tau puab huv kuv txhais teg moog. 29 Tej kws kuv txwv muab pub tsua kuv lawm tseem ceeb dua ndais huvsw. Tsw muaj leejtwg yuav tuaj txhaav tau tej kws kuv txwv tsum kwm. 30 Leej txwv hab kuv yog tuab tug.

31 Thaus cov Yutai nov Yexu has le hov, puab txawm rov khaws pob zeb yuav ntaus Yexu.

32 Yexu has tsua puab has tas, kuv txwv kuas kuv ua ntau yaam num zoo tsua mej saib. Yog yaam twg ua tsua mej mob sab ais mej tsua yuav xuas pob zeb ntaus kuv nua. 33 Cov Yutai teb has tas, qhov kws peb yuav ntaus koj tsw yog vem tej num zoo kws koj ua, kuas vem koj has lug saib tsw taug Vaajtswv. Koj yog tuabneeg ib yaam le suavdawg xwb, ua caag koj yuav laam khaav has tas, koj yog Vaajtswv. 34 Yexu has tsua puab has tas, muaj lug sau ca tsua huv mej txuj kevcai has tas, Vaajtswv has tas, mej zoo le Vaajtswv. 35 Peb paub has tas, Vaajtswv txuj-lug yog has tseeb moog ib txhws le. Yog Vaajtswv tub hu cov tuabneeg kws nov Vaajtswv txuj-lug has tas, puab zoo le Vaajtswv, 36 yog le ntawm ua caag thaus kuv has tas, kuv yog Vaajtswv tug tub mej tsua thuaaj thuaaj kuv has tas, kuv has lug saib tsw taug Vaajtswv nua. Kuv yog tug kws leej txwv xaiv hab khaiv lug huv nplaj-teb nuav. 37 Yog mej tsw pum kuv ua leej txwv teg num, mej tsw xob ntseeg kuv tej lug. 38 Kuas yog mej tub pum kuv ua lawm, txawm yog mej tsw ntseeg kuv tej lug los mej yuav tsum ntseeg tej num kws mej pum kuv ua. Yog mej ntseeg teg num kws kuv ua mas mej yuav paub has tas, kuv txwv hab kuv koom ib txujsa.

39 Cov tuabneeg hov yuav rov nteg Yexu, kuas Yexu ca le moog dhau plhawv lawm, puab nteg tsw tau nwg.

40 Yexu rov qaab hlaa tug nam dej Yalatee moog tim qhov chaw kws Yauhaa muab tuabneeg ua kevcai raus dej, Yexu nyob tim. 41 Muaj tuabneeg coob coob tuaj cuag Yexu. Puab sws thaam has tas, Yauhaa tub tsw tau ua ib yaam txujci tseem ceeb daabtsw le. Kuas tej lug kws Yauhaa has txug tug nuav puav leej muaj tseeb. 42 Tes txawm muaj tuabneeg coob lug ntseeg Yexu.

### Laxalau tuag

**11** Muaj ib tug txwv neej npe hu ua Laxalau nyob huv lub zog Npethani, nwg mob. Nwg ob tug muam ib tug npe hu ua Maivlag, ib tug npe hu ua Matha. Matha yog tug muam hlub. 2 Tug Maivlag nuav yog tug kws tom qaab nuav muab roj tsw-qaab laub ywg Yexu kwtaw, hab nwg muab nwg cov plaub hau lug so. 3 Tug Laxalau kws mob yog Maivlag tug nug. Laxalau ob tug muam khaiv tuabneeg moog has tsua Yexu has tas, xwbfwb, koj tug kwvluag kws koj hlub mob lawm. 4 Thaus Yexu nov le hov, Yexu has tas, Laxalau tug mob yeej yuav tsw ua tsua Laxalau tuag, kuas yuav ua tsua. Vaajtswv tau koob meej hab yuav ua tsua Vaajtswv tug tub tau koob meej.

5 Yexu hlub Matha hab Matha tug nam hluas hab Laxalau puab heev. 6 Thaus Yexu nov has tas Laxalau mob lawm los Yexu tseem nyob qhov qub chaw tau ob nub. 7 Dhau ob nub hov lawm Yexu txawm has tsua Yexu cov thwjtim has tas, peb rov qaab

moog nraag Yutai tebchaws. 8 Cov thwjtim has tsua Yexu has tas, xwbfbw, tsw ntev nuav, cov Yutai tub yuav xuas pob zeb ntaus koj, koj tseem yuav rov moog lawm nraag hab los. 9 Yexu teb has tas, ib nub muaj kaum ob chuaj moos los tsw yog. Yog leejtwg taug kev nruab nub nwg yuav tsw dawm, tsua qhov nwg pum kev. 10 Kuas yog nwg taug kev mo ntuj nwg yeej yuav dawm, vem nwg tsw pum kev. 11 Yexu has le nuav taag, Yexu txawm rov has tas, peb tug kwvluag Laxalau tub tsaug zug lawm, kuas kuv yuav moog tsaa nwg sawv. 12 Cov thwjtim teb Yexu has tas, xwbfbw yog nwg tsaug taug zug lawm, nwg tug mob yeej yuav zoo. 13 Yexu has txug qhov kws Laxalau tuag lawm, kuas cov thwjtim xaav has tas, yog Yexu has txug qhov kws Laxalau tsaug zug xwb. 14 Yexu qha tseeb tseeb tsua puab has tas, Laxalau tub tuag lawm. 15 Kuas kuv zoo sab kws kuv tsw nyob ntawm, kuv txha paab tau mej tso sab tsua kuv. Peb ca le moog saib nwg. 16 Tug Thagma kws muaj dua npe hu ua Ntxaib has tsua cov thwjtim kws nrug nwg ua ib paab has tas, peb ca le nrug xwbfbw moog, peb txha tau nrug nwg tuag ua ke.

Yexu yog tug kws tsaa tuabneeg sawv hab pub txujsa

17 Thaus Yexu moog txug huv lub zog Npethani Yexu nov has tas, puab tub muab Laxalau log tau plaub nub lawm. 18 Lub zog Npethani nyob deb ntawm lub nroog Yeluxalee kwvlaam peb kislus kev. 19 Cov Yutai muaj ntau leej tuaj saib Matha hab Maivlag. Puab tuaj nplig ob tug vem ob tug tug nug tuag lawm.

20 Thaus Matha nov has tas, Yexu saamswm tuaj,

Matha txawm moog tog Yexu, kuas Maivlag nyob huv tsev. 21 Matha has tsua Yexu has tas, xwbfbw, yog koj nrug peb nyob ntawm nuav tes kuv tug nug tsw leej tuag le. 22 Kuas kuv paub has tas, txawm yog nwg nuav koj thov Vaaajtswv pub ib yaam daabtsw tsua koj los Vaaajtswv yeej yuav pub yaam ntawm tsua koj. 23 Yexu has tsua Matha has tas, koj tug nug yuav sawv rov qaab lug. 24 Matha teb has tas, kuv paub has tas, thaus txug nub kawg nwg yeej yuav sawv rov qaab lug tag. 25 Yexu has tsua Matha has tas, kuv yog tug kws tsaa kuas tuabneeg sawv huv qhov tuag rov qaab lug, hab ua kuas tuabneeg muaj txujsa. Tug kws ntseeg kuv, txawm yog nwg tuag lawm los nwg yeej yuav muaj txujsa. 26 Tug kws muaj txujsa hab ntseeg kuv, tug ntawm yuav tsw tuag le. Koj ntseeg kuv tej lug nuav los tsw ntseeg. 27 Matha teb has tas, xwbfbw kuv ntseeg has tas, koj yog Vaaajtswv tug tub kws Vaaajtswv khai lug ua tuabneeg tug Cawmseej huv nplajteb nuav.

### Yexu quaj quaj

28 Matha has le nuav taag, Matha txawm rov lug has tuab ywv tsua Matha tug nam hluas Maivlag has tas, xwbfbw tuaj lawm, nwg nug nug koj. 29 Thaus Maivlag nov dheev Matha has le hov, Maivlag txawm sawv tseeg moog tog Yexu. 30 Yexu tseem tuaj tsw tau txug huv zog. Nwg tseem nyob tom qhov chaw kws Matha moog ntswb nwg. 31 Thaus cov Yutai kws tuaj nplig Maivlag huv Maivlag tsev pum Maivlag sawv tseeg tawm nrawm nroog moog lawm, puab txawm lawv nwg qaab moog. Puab xaav has tas, nwg yuav moog quaj tom lub ntxaa.

32 Thaus Maivlag moog txug tom kws Yexu nyob, Maivlag pum dheev Yexu, Maivlag txawm qhau cev hlo ntawm Yexu kwtaw has tas, xwbfbw, yog koj nrug peb nyob ntawm nuav tes kuv tug nug tsw leej tuag le. 33 Thaus Yexu pum Maivlag hab cov Yutai kws nrug Maivlag tuaj, puab quaj quaj, Yexu hlub puab hab mob sab puab kawg le. 34 Yexu nug puab has tas, mej muab nwg log tsua hov twg. Puab teb has tas, xwbfbw, koj nrug peb moog saib. 35 Yexu quaj quaj hab. 36 Cov Yutai txawm has tas, mej swm saib Yexu hlub Laxalau kawg le. 37 Kuas muaj qee leej has tas, nwg tub khu tau tug dig muag u pum kev ne. Nwg ua tsw tau kuas Laxalau tsw xob tuag los.

### Laxalau sawv huv qhov tuag rov lug

38 Yexu rov mob sab kawg le. Nwg txawm moog tom lub ntxaa. Lub qhov ntxaa ntawm puab txaug tsua huv ib phaab zeb, hab muaj ib daim laag zeb npug lub rooj ntxaa. 39 Yexu has tas, mej ca le muab daim laag zeb tshem. Laxalau tug muam Matha txawm has tas, xwbfbw, peb tub muab nwg log tau plaub nub lawm, ntshai nwg nuav tsw-lwj lawm lauj. 40 Yexu has tsua Matha has tas, kuv tub has tsua koj has tas, yog koj ntseeg koj yeej yuav pum Vaajtswv tug fwjchim nua ne. 41 Cov tuabneeg ntawm txawm muab daim laag zeb tshem. Thaus puab muab daim laag zeb tshem lawm, Yexu tsaa muag saib sau ntuj mas has tas, txwv, kuv ua koj tsaug tsua qhov koj yeej noog kuv tej lug thov. 42 Kuv paub has tas, koj yeej ib txwm noog kuv tej lug thov. Kuv has le nuav tub yog kuv xaav kuas cov tuabneeg kws nyob ntawm nuav ntseeg has tas, koj yog tug kws khaiv kuv lug.



43 Thaus Yexu has le hov taag Yexu txawm hu nrov nrov has tas, Laxalau, koj ca le tawm lug.

44 Tug tuag txawm tawm lug. Muaj nrhoob qhwv nwg teg nwg taw, hab muaj ib daim ntaub npug nwg lub plhu. Yexu has tsua puab has tas, mej ca le daws tej nrhoob kws qhwv nwg pov tseg, es ca nwg moog.

Cov Yutai tuav huv nteg Yexu

(Mth 26:1-5, Mlk 14:1-2, Lk 22:1-2)

45 Thaus cov Yutai kws tuaj saib Maivlag pum tej kws Yexu ua hov, muaj ntau leej txawm ntseeg Yexu. 46 Kuas muaj qee leej moog qha tej kws Yexu ua huvsw tsua cov Falixai. 47 Tes cov Falixai hab cov pov thawj hlub txawm moog hu Yutai cov thawj tuaj sablaaj has tas, peb yuav ua le caag tsua tug txwv neej kws ua tej txujci tseem ceeb nuav. 48 Yog peb ca nwg ua nwg, ntshai tej pejxeem yuav ntseeg nwg taag, tes cov num tswv Loo yuav tuaj muab lub tuam tsev thov Vaajtswv lauj pov tseg, hab yuav ua tsua peb tsaav tuabneeg puam tsuaj taag huvsw. 49 Huv puab cov ntawm muaj ib tug npe hu ua Kayafa. Xyoo hov nwg ua tug tuam pov thawj hlub, mas nwg has tsua suavdawg has tas, ua caag mej yuav ruag ua luaj le. 50 Mej tsw paub los. Ca ib tug tuag zoo dua le ca peb tsaav tuabneeg puam tsuaj taag nrho los maj. 51 Qhov tseem ceeb, tej lug kws Kayafa has ntawm tsw yog nwg laam has nwg. Nwg has le hov vem xyoo hov nwg ua tug tuam pov thawj hlub. Tej lug kws nwg has yog nwg qha ua ntej has tas, Yexu yuav tuag thijs cov Yutai. 52 Tsw yog le ntawm xwb, Yexu tseem yuav coj Vaajtswv cov mivnyuas kws tswv moog nyob hov txhua hov chaw rov

lug nyob ua ke. 53 Txwj nub ntawm lug Yutai cov num tswv txha le tuav huv nrhav kev muab Yexu tua pov tseg. 54 Vem le ntawm Yexu txha tsw taab meeg moog moog lug lug huv Yutai tebchaws lawm. Nwg ca le moog tom ib lub moos kws nyob ze ze tebchaws moj saab qhua. Lub moos hov npe hu ua Efa-i. Nwg nrug nwg cov thwjtim nyob tom.

55 Thaus hov tub yuav txug lub caij kws cov Yutai ua kevcai hlaa dhau. Muaj tuabneeg coob coob tuaj peg tej toj sab tuaj tsua huv lub nroog Yeluxalee. Puab yuav xub ua kevcai ntxuav tsaiv le maav ua kevcai hlaa dhau. 56 Thaus suavdawg tuaj ua ke huv lub tuam tsev thov Vaajtswv, puab xaam tsua hov nuav hov u saib pum Yexu los tsw pum. Puab sws thaam has tas, sov nwg yuav tuaj ua kevcai nuav los tsw tuaj ne. Ntshai nwg tsw tuaj pauj. 57 Cov pov thawj hlub hab cov Falixai tub xub has tsua suavdawg has tas, yog leejtwg paub has tas, Yexu nyob hov twg tes ca le kawgkag lug qha tsua puab, puab yuav moog nteg Yexu.

Maivlag laub roj tsua Yexu kwtaw  
(Mth 26:6-13, Mlk 14:3-9)

**12** Thaus tseem tshuav rau nub le txug lub caij ua kevcai hlaa dhau, Yexu moog tom lub zog Npethani. Tug Laxalau kws Yexu tsaa sawv huv qhov tuag rov qaab lug nwg kuj nyob huv lub zog hov. 2 Puab ua ib rooj mov tsua Yexu noj. Matha ua tug thab zaub thab mov tsua suavdawg noj. Laxalau nrug Yexu nyob ua ke noj mov. 3 Maivlag nqaa ib fwj roj tsw-qaab kim kim lug laub tsua Yexu kwtaw, hab nwg muab nwg cov plaub

hau lug so. Cov roj ntawm tsw thoob plawg huv tsev. 4 Thaus Yexu tug thwjtim kws npe hu ua Yuta lkhallau kws yuav faav xeeb tsua Yexu pum le hov, nwg txawm has tas, 5 ua le caag tsw muab cov roj tsw-qaab hov coj moog muag peb puas txaj thes ais coj moog faib tsua cov pluag. 6 Yuta has le hov tsw yog vem nwg hlub cov pluag kuas nwg yog tub saab. Nwg yog tug kws ceev lub naab nyaj hab nwg yeej ib txwm pheej qee mivntswv coj moog swv. 7 Kuas Yexu has tas, xwjpeem nwg los maj. Ca nwg ua nwg, nwg npaaj tej nuav tseg tsua nub kws log kuv. 8 Cov pluag naj nub nrug mej nyob kuas kuv yuav tsw nrug mej nyob moog ib swm.

#### Cov Yutai tuav huv yuav tua Laxalau

9 Cov Yutai muaj ntau leej nov has tas, Yexu nyob tom lub zog Npethani, tes puab txawm moog tom vem puab xaav pum Yexu hab tug Laxalau kws Yexu tub tsaa sawv huv qhov tuag rov qaab lug lawm. 10 Vem le ntawm cov pov thawj hlub txha tuav huv yuav muab Laxalau tua pov tseg hab, 11 tsua qhov puab pum has tas, qhov kws Yexu tsaa Laxalau sawv rov qaab lug hov, ua tsua suavdawg ntseeg Yexu taag, hab suavdawg tso cov thawj tseg lawm.

#### Yexu moog huv lub nroog Yeluxalee

12 Thaus kaaj ntug cov tuabneeg coob coob kws tuaj ua kevcai hlaa dhau, suavdawg nov has tas, Yexu yuav tuaj huv lub nroog Yeluxalee hab, 13 tes puab nyag taug nyag moog txav nplooj toov laaj nqaa moog tog Yexu. Puab has nrov nrov has

tas, qhuas Vaajtswv. Thov Vaajtswv foom koob foom moov tsua tug kws Vaajtswv khaiv lug. Thov Vaajtswv foom koob foom moov tsua cov Yixayee tug vaaj ntxwv. 14 Yexu taug kev tuaj pum ib tug luav, Yexu txawm muab caij. Tej nuav muaj lawv le tej lug kws sau ca tsua huv Vaajtswv phoo ntawv has tas,

15 Lub nroog Xi-oo, koj tsw xob ntshai.

Koj swm saib saib koj tug vaaj ntxwv caij  
ib tug mivnyuas luav lug tsua ntawm koj.

16 Thaus hov Yexu cov thwjtim tsw nkaag sab tej lug nuav, kuas thaus Vaajtswv tsaa Yexu sawv huv qhov tuag rov qaab lug, hab ua tsua Yexu tau koob meej lawm, cov thwjtim txha le ncu dheev txug has tas, tub muaj lug sau ca tsua huv Vaajtswv phoo ntawv has ca le ntawm, hab tub muaj tuabneeg ua le hov tsua Yexu lawm tag.

17 Cov tuabneeg kws pum Yexu tsaa Laxalau sawv huv qhov tuag hab nov Yexu hu Laxalau tawm huv qhov ntxaa lug tub xub pav tej kws puab pum hab puab nov tsua suavdawg noog lawm. 18 Yog le ntawm txha le muaj tuabneeg coob coob tawm tuaj tog Yexu, tsua qhov puab nov has tas, Yexu ua tau tej txujci tseem ceeb nuav. 19 Thaus cov Falixai pum le ntawm puab sws thaam has tas, txawm yog peb yuav ua le caag los ntshai tsw muaj qaabhau lawm lauj. Mej swm saib saib, taag teb taag chaw puav leej ntseeg nwg huvsw.

Cov Kili xaav ntswb Yexu

20 Cov tuabneeg kws tuaj ua kevcai huv lub

nroog Yeluxalee muaj ib txha yog tuabneeg Kili. 21 Cov tuabneeg ntawm tuaj nug Fili has tas, npawg, peb xaav ntswb Yexu. Fili yog cov tuabneeg peg lub moos Npexayata huv Kalilai tebchaws. 22 Fili moog qha Aatali, ob tug txawm moog has Yexu. 23 Yexu teb ob tug has tas, tub yuav txug lub swmhawm kws Vaajtswv ua tsua Tuabneeg Leej Tub tau koob meej. 24 Kuv qha tseeb tsua mej has tas, yog yug tsw muab lub noob nplej koj moog faus aav tes tsuas nyob tuab lub le qub xwb. Kuas yuav tsum muab faus aav kuas lub noob lwj, txha tuaj kaug hab txw tau ntau. 25 Tug kws khauv xwm nwg txujsa nwg txujsa yuav tu, kuas tug kws tsw khauv xwm nwg txujsa kws nyob huv nplajteb nuav, tug ntawm yuav tau txujsa ntev moog ib txhws tsw kawg. 26 Tug kws xaav ua kuv tug tub qhe nwg yuav tsum nrug kuv moog, kuv tug tub qhe yeej yuav tsum nrug kuv nyob ua ke. Kuv txwv yuav qhuas tug kws ua kuv tug tub qhe.

Yexu has txug nwg kev tuag

27 Nwgnuav kuv ntXHuv sab kawg le. Kuv yuav has le caag txha zoo. Kuv yuav ca le has tas, txwv, thov koj tsw xob ca kuv raug tej kev txom nyem kws yuav muaj lug nuav. Kuv yuav has le ntawm los. Tsw yog. Kuv yeej zoo sab raug tej kev txom nyem nuav kuv txha le lug. 28 Txwv, thov kuas koj lub npe tau koob meej. Thaus Yexu has le hov taag muaj ib lub suab has sau ntuj tuaj has tas, kuv tub ua tsua kuv lub npe tau koob meej lawm, kuas nwgnuav kuv yuav rov qaab ua dua hab.

29 Cov tuabneeg kws nrug Yexu nyob ua ke nov lub suab ntawm, puab txawm has tas, xub quaj pauj. Muaj qee leej has tas, ib tug tubkhai sau ntuj nrug nwg thaam. 30 Kuas Yexu has tsua puab has tas, lub suab ntawm tsw yog has tsua kuv, yog has tsua mej. 31 Nwgnuav yog lub swm-hawm kws Vaajtswv yuav teem txem tsua tuabneeg nplajteb, hab tug kws kaav nplajteb yuav raug ntab tawm moog. 32 Kuas kuv le thaus muaj tuabneeg muab kuv teem tsua sau ntoo khaublig kuv yuav coj txhua tsaav tuabneeg lug cuag kuv. 33 Yexu has le nuav tub yog Yexu has tas, Yexu yuav tuag le caag. 34 Suavdawg txawm teb has tas, peb kevcai qha peb has tas, tug kws Vaajtswv khaiv lug ua tug Cawmseej yeej yuav nyob moog ib txhws le, ais ua caag koj tsua has tas, luas yuav muab Tuabneeg Leej Tub teem tsua sau ntoo khaublig nua, Tuabneeg Leej Tub yog leejtwg. 35 Yexu has tsua puab has tas, qhov kaaj tseem yuav nrug mej nyob ib nyuas ntu hab. Tsheem tseem pum kev mej ca le rau sab ntso ua mej lub neej, tsaam tsaus mej ntuj, tsua qhov tug kws xuas dub yeej tsw pum kev moog. 36 Yog le ntawm thaus tseem muaj qhov kaaj mej ca le ntseeg qhov kaaj ntawm, mej txha ua tau cov tuabneeg kws nyob qhov kaaj.

### Cov Yutai tsw ntseeg Yexu

Thaus Yexu has le hov taag Yexu txawm ca le moog tswv nraim lawm. 37 Puab tub pum Yexu ua ntau yaam txujci tseem ceeb los puab tseem tsw ntseeg Yexu tej lug hab. 38 Tej nuav muaj lawv le tej kws xwbfbw Yaxaya kws cev Vaajtswv lug tau sau tseg has tas,

Vaajtswv, leejtwg yuav ntseeg tej lug kws  
peb qha.

Koj ua koj tug fwjchim tsua leejtwg pum.

39 Tub yog vem le nuav puab txha tsw ntseeg,  
tsua qhov Yaxaya has dua ib zaaj has tas,

40 Vaajtswv ua tsua puab dig muag,  
hab ua tsua puab lub sab ruag,  
kuas puab lub qhov muag tsw pum kev,  
hab kuas puab lub sab tsw to taub.  
Puab txha tsw tau lug kuas kuv khu puab  
tej mob.

41 Yaxaya has le ntawm tsua qhov nwg tub xub pum  
Yexu tug fwjchim, nwg txha has txug Yexu.

42 Cov Yutai cov thawj muaj ntau leej ntseeg  
Yexu, kuas puab tsw taab meeg qha tsua suavdawg  
has tas, puab ntseeg tsua qhov puab ntshai tsaam  
cov Falixai tsw kheev puab moog noog lug qhuab  
qha huv tsev sablaaj lawm. 43 Puab nyam kuas  
tuabneeg zoo sab tsua puab heev dua le nyam Vaaj-  
tswv zoo sab tsua puab.

Yexu tej lug ua tsua suavdawg raug txem

44 Yexu has nrov nrov tsua suavdawg has tas,  
tug kws ntseeg kuv, tsw yog nwg ntseeg kuv ib  
leeg xwb, kuas nwg ntseeg tug kws khaiv kuv lug  
hab. 45 Tug kws pum kuv kuj yog pum tug kws khaiv  
kuv lug hab. 46 Kuv lug ua qhov kaaj tsua tuab-  
neeg nplajteb pum kev. Tug kws ntseeg kuv nwg  
tsw nyob huv qhov tsaus ntuj lawm. 47 Tug kws  
nov kuv tej lug los nwg tsw ntseeg, kuv kuj tsw  
teem txem tsua nwg, tsua qhov tsw yog kuv lug  
teem txem tsua tuabneeg nplajteb, yog kuv lug



cawm puab dim puab lub txem xwb. 48 Muaj ib tug yuav teem txem tsua txhua tug kws tsw leeg paub kuv hab tsw noog kuv tej lug qha. Thaus txug nub kawg nwg yuav teem txem tsua tug ntawm lawv le tej lug kws kuv qha. 49 Tsua qhov tej lug hov tsw yog kuv laam has kuv, kuas leej txwv kws khaiv kuv lug yog tug kws qha kuv has. 50 Kuv paub has tas, tej lug kws nwg has ntawm yuav cawm tau tuabneeg txujsa moog ib txhws. Tej lug kws kuv has puav leej yog kuv txwv qha tsua kuv.

### Yexu ntxuav cov thwjtim kwtaw

**13** Tshuav ib mos tes txug nub ua kevcai hlaa dhau. Yexu paub has tas, tub txug lub swmhawm kws Yexu yuav tawm huv nplajteb nuav rov moog cuag leej txwv. Yexu yeej ib txwm hlub nwg cov tuabneeg kws nyob huv nplajteb nuav, nwg hlub puab kawg kev nkaus le.

2 Thaus Yexu hab Yexu cov thwjtim saamswm noj mo, Daab Ntxwg Nyoog tub xub tshoov Ximoo Ikha-lau tug tub Yuta lub sab kuas faav xeeb tsua Yexu ua ntej lawm. 3 Yexu paub tas, leej txwv tub muab ib puas tsaav yaam huvsw tso tsua Yexu kaav lawm, hab paub has tas Vaajtswv khaiv nwg lug hab nwg yuav rov qaab moog cuag Vaajtswv, 4 Yexu txawm sawv ntawm rooj mov, nwg hle nwg lub tsho ntev, nwg muab ib txuj phuum lug sa, 5 tes nwg muab dej laub tsua huv lub phaaj nqaa lug ntxuav cov thwjtim kwtaw. Nwg muab txuj phuum kws nwg sa lug so puab kwtaw. 6 Thaus Yexu ntxuav lug txug ntawm Ximoo Pestus, Ximoo Pestus txawm nug Yexu has tas, tug tswv koj yuav ntxuav

kuv kwtaw los. 7 Yexu teb has tas, nwgnuav koj tseem tsw tau to taub qhov kws kuv ua nuav, kuas lwm nub koj yeej yuav to taub. 8 Pestus has tas, kuv yeej tsw kheev koj ntxuav kuv kwtaw ib zag le. Yexu teb has tas, yog kuv tsw ntxuav koj kwtaw, koj yuav tsw tau ua kuv le thwjtim. 9 Ximoo Pestus txawm has tas, xwbfbw yog le tes koj ca le ntxuav kuv teg, hab kuv taubhau huvsw tsw xob ntxuav kwtaw xwb. 10 Yexu has tas, tug kws daa dej lawm, nwg lub cev yeej huv lawm, tsw taag yuav rov ntxuav dua, tsuas yog ntxuav kwtaw xwb. Mej txhua tug puav leej huv lawm, tsuas yog tshuav ib tug txha tsw huv xwb. 11 Yexu tub paub has tas, tug twg yuav faav xeeb tsua Yexu. Yog le ntawm Yexu txha has tas, mej txhua tug puav leej huv lawm, tsuas yog tshuav ib tug xwb txha tsw huv.

12 Thaus Yexu ntxuav cov thwjtim kwtaw taag Yexu txawm muab Yexu lub tsho ntev rov lug naav, hab nwg rov lug nyob ntawm rooj mov. Yexu nug cov thwjtim has tas, qhov kws kuv ua ntawm mej nkaag sab los tsw nkaag. 13 Mej hu kuv has tas, xwbfbw, hab hu has tas, tug tswv. Mej hu le ntawm mej hu yog lawm lauj, Tsua qhov kuv yeej yog tag. 14 Kuv yog mej tug xwbfbw hab yog mej tug tswv, kuv tub ntxuav mej kwtaw. Yog le hov mej ib leeg yuav tsum ntxuav ib leeg kwtaw. 15 Kuv ua le nuav qha mej kuas mej xyum ua lawv le kuv ua. 16 Kuv qha tseeb tsua mej has tas, tug tub qhe yeej tsw muaj fwjchim luj dua nwg tug tswv. Tug tubkhai yeej tsw muaj fwjchim luj dua tug kws khai nwg moog. 17 Thaus mej nkaag sab qhov kws kuv ua nuav hab mej ua lawv le hov lawm, mej yuav tau zoo nyob kaaj sab quas lug.

18 Kuv tsw has txug mej txhua tug. Kuv yeej paub cov kws kuv tau xaiv ca lawm. Kuas yuav tsum muaj lawv le tej lug kws sau ca tsua huv Vaajtswv phoo ntawv has tas, tug kws noj kuv le mov yuav rov faav xeeb tsua kuv. 19 Nwgnuav tseem tsw tau muaj le hov, kuas kuv xub qha tsua mej ua ntej. Thaus muaj lawm mej txha le paub has tas, tug kws kuv has ntawm tub yog kuv ntaag. 20 Kuv qha tseeb tsua mej has tas, leejtwg noog tug kws kuv khaiv moog tej lug, kuj yog nwg noog kuv lug hab. Leejtwg noog kuv lug tes kuj yog tug hov noog tug kws khaiv kuv lug tej lug hab.

Yuta yuav faav xeeb tsua Yexu

(Mth 26:20-25, Mlk 14:17-21, Lk 22:21-23)

21 Thaus Yexu has le ntawm taag Yexu ntxhuv sab heev. Yexu txawm has tas, kuv qha tseeb tsua mej has tas, mej cov muaj ib tug yuav faav xeeb tsua kuv. 22 Cov thwjtim txawm sws saib zum quas zawg, puab tsw paub sov Yexu has txug leejtwg. 23 Tug thwjtim kws Yexu nyam heev nyob npuas Yexu. 24 Tes Ximoo Pestus txawm ua laaj muag saib tug thwjtim hov hab has tsua nwg has tas, koj swm nug Yexu saib yog leejtwg. 25 Tug thwjtim ntawm tig hlo moog nug Yexu has tas, xwbfwb yog leejtwg nej. 26 Yexu teb has tas, kuv ntsu ncuav cev tsua leejtwg tes yog tug ntawm ntaag lauj. Yexu txawm ntsu ncuav cev tsua Ximoo lkhalaug tug tub Yuta. 27 Thaus Yuta txais nkaus daim ncuav tes taamswm hov Daab Ntxwg Nyoo txawm txeem plawg tsua huv Yuta sab. Yexu has tsua Yuta has tas, koj yuav ua daabtsu koj ca le ua. 28 Cov thwjtim kws nyob ntawm rooj mov tsw muaj ib tug paub sov yog ua

caag Yexu has le hov tsua Yuta. 29 Tsua qhov Yuta yeej yog tug kws ceev naab nyaj, cov thwjtim muaj qee leej txawm xaav tuab ywv has tas, ntshai yog Yexu has kuas Yuta moog yuav ib yaam daabtsw lug swv ua kevcai, lossws kuas nwg muab mivntswv nyaj coj moog pub tsua cov tuabneeg pluag. 30 Thaus Yuta txais nkaus daim ncuav moog noj tes taamswm ntawm Yuta txawm tawm plawg lawm. Thaus hov tub tsaus ntuj lawm.

### Yexu qha ib txuj kevcai tshab

31 Thaus Yuta tawm plawg Yexu has tas, nwg-nuav tub txug lub swmhawm kws Tuabneeg Leej Tub tau koob meej lawm. Mej yuav pum Tuabneeg Leej Tub ua tsua Vaajtswv tau koob meej. 32 Yog Tuabneeg Leej Tub ua tsua Vaajtswv tau koob meej lawm, Vaajtswv yeej yuav ua tsua Tuabneeg Leej Tub tau koob meej hab. Vaajtswv yuav ua le hov taamswm nuav ntaag. 33 Cov mivnyuas, kuv yuav nrug mej nyob tsw ntev. Mej yuav nrhav kuv, kuas nwgnuav kuv qha tsua mej ib yaam le kuv tub qha tsua cov Yutai has tas, lub chaw kws kuv moog ntawm mej moog tsw tau. 34 Kuv yuav qha txuj kevcai tshab tsua mej. Txuj kevcai tshab hov yog le nuav, mej ib leeg yuav tsum hlub ib leeg, ib yaam le kuv hlub mej. 35 Yog mej ib leeg hlub ib leeg, suavdawg txha paub has tas, mej yog kuv cov thwjtim.

### Pestus yuav tsw leeg paub Yexu

(Mth 26:31-35, Mk 14:27-31, Lk 22:31-34)

36 Ximoo Pestus nug Yexu has tas, xwbfbw, koj yuav moog hov twg. Yexu teb has tas, lub chaw

kws kuv yuav moog ntawm, nwnuav koj nrug kuv moog tsw tau, kuas tuab maav koj yuav lawv kuv qaab hab. 37 Pestus nug Yexu has tas, xwbfbw ua caag nwnuav kuv nrug koj moog tsw tau. Kuv yeej zoo sab tuag theej koj chaw. 38 Yexu teb has tas, koj yeej zoo sab tuag theej kuv chaw tag los. Kuv qha tseeb tsua koj has tas, thaus qab tsw tau qua koj yuav has peb zag has tas, koj tsw paub kuv.

### Yexu yog txujkev moog cuag Vaajtswv

**14** Yexu has tsua cov thwjtim has tas, mej tsw xob txhawj. Mej yuav tsum tso sab tsua Vaajtswv hab tso sab tsua kuv. 2 Kuv txwv lub tsev muaj chaw nyob ntau ntau le. Kuv saamswm yuav moog tu chaw tseg ca tsua mej nyob. Yog tsw muaj, tes kuv yeej tsw has le nuav tsua mej. 3 Thaus kuv moog tu tau chaw tseg tsua mej lawm, kuv yuav rov lug tog mej moog nrug kuv nyob. Yog kuv nyob hov twg mej yuav tau nrug kuv nyob hov ntawm. 4 Lub chaw kws kuv yuav moog mej tub paub kev moog lawm. 5 Thaum has tsua Yexu has tas, xwbfbw, peb tub tsw paub sov koj yuav moog hov twg, ais peb txhooj kum paub txujkev kws moog. 6 Yexu teb has tas, kuv yog txujkev ntawm, kuv yog qhov tseeb hab yog txujsa, tsw muaj leejtwg yuav moog cuag tau leej txwv tsuas yog lug ntawm kuv moog xwb txha tau. 7 Yexu has tsua puab has tas, yog mej paub kuv lawm, mej yeej yuav paub kuv txwv hab. Nwnuav mej tub paub nwg hab pum nwg lawm.

8 Fili has tsua Yexu has tas, xwbfbw, thov koj ua kuas peb pum leej txwv txha txaus nkaus

peb lub sab. 9 Yexu teb has tas, Fili, kuv tub nrug mej nyob ntev lug lawm, ua caag koj tseem has tas, thov koj ua kuas peb pum leej txwv nua. 10 Fili, koj tsw ntseeg tas, kuv nrug leej txwv koom ib txujsa, hab leej txwv nrug kuv koom ib txujsa nua los. Yexu has tsua Yexu cov thwjtim has tas, tej lug kws kuv qha tsua mej nuav, yeej tsw yog kuv le lug, kuas yog leej txwv kws nrug kuv koom ib txujsa kws khaiv kuv ua nwg teg num le lug. 11 Mej yuav tsum ntseeg tas, kuv nrug kuv txwv koom ib txujsa, kuv txwv nrug kuv koom ib txujsa. Txawm yog mej tsw ntseeg le kuv has los mej yuav tsum tso sab tsua kuv, tsua qhov mej tub pum tej num kws kuv tau ua lug lawm. 12 Kuv qha tseeb tsua mej has tas, tug kws ntseeg kuv mas yuav ua tau tej num kws kuv ua. Tsw yog le ntawm xwb nwg tseem yuav ua tau ntau dua tej kws kuv ua hab, tsua qhov kuv yuav moog cuag leej txwv. 13 Yog mej tuav kuv lub npe thov ib yaam daabtsw kuv yuav pub yaam hov tsua mej. Tej kws leej tub ua ntawm yuav ua tsua leej txwv tau koob meej. 14 Yog mej tuav kuv lub npe thov kuv ua ib yaam daabtsw, kuv yuav ua yaam hov tsua mej.

### Vaajtswv yuav khaiv Tug Ntsuj Plig lug

15 Yog mej noog kuv lug, mej yeej yuav ua lawv le tej kws kuv has. 16 Kuv yuav thov leej txwv mas leej txwv yuav khaiv dua ib tug lug paab mej, nwg yuav nrug mej nyob moog ib txhws le. 17 Tug ntawm yog Vaajtswv tug Ntsuj Plig kws yuav qha qhov tseeb tsua mej, tuabneeg nplajteb tsw leeg yuav nwg, tsua qhov puab tsw pum nwg hab tsw paub nwg. Kuas mej paub nwg,

vem nwg nrug mej nyob hab nwg nyob huv mej lub sab.

18 Kuv yuav tsw tso mej tseg le. Kuv yuav rov lug cuag mej. 19 Tshuav tsw ntev tuabneeg nplajteb yuav tsw pum kuv lawm, kuas mej yuav pum kuv. Mej yuav muaj txujsa nyob, vem kuv muaj txujsa nyob. 20 Thaus txug nub ntawm mej yuav paub has tas, kuv nrug leej txwv koom ib txujsa, hab mej nrug kuv koom ua ib txujsa, hab kuv nrug mej koom ua ib txujsa.

21 Tug kws paub kuv hab noog kuv tej lug, tug hov txha yog tug kws nyam kuv. Kuv txwv yuav hlub tug kws noog kuv lug hab kuv yuav hlub tug hov hab qheb nwg qhov muag kuas pum kuv. 22 Yuta kws tsw yog Yuta Ikhalaug nug Yexu has tas, xwbfbw, ua caag koj yuav ca peb pum koj xwb, koj tsua tsw kheev tuabneeg nplajteb pum koj. 23 Yexu teb has tas, tug kws nyam kuv, nwg yeej yuav ua lawv le kuv qha. Kuv txwv yuav hlub tug hov, kuv txwv ib yuav lug cuag nwg hab nrug nwg nyob. 24 Tug kws tsw nyam kuv nwg yeej tsw ua lawv le kuv qha. Tej lug kws mej nov kuv has, tsw yog kuv le lug, kuas yog leej txwv kws khaiv kuv lug le lug.

25 Nwgnuav kuv tseem nrug mej nyob kuv txha qha tej nuav tsua mej. 26 Tug paab ntawm yog Vaajtswv tug Ntsuj Plig kws kuv kuas leej txwv khaiv lug. Nwg yuav qha txhua yaam tsua mej hab paab mej kuas mej ncu ntsoov ib puas tsaav yaam kws kuv tau qha tsua mej lawm.

27 Kuv pub kuv lub sab tug tug tsua mej mas



mej txha muaj sab tug. Lub sab tug kws kuv pub tsw thooj le tej kws nyob huv nplajteb nuav pub. Mej tsw xob txhawj, tsw xob ntshai. 28 Mej tub nov kuv has tsua mej tas, kuv yuav moog, kuas kuv yuav rov qaab lug cuag mej. Yog mej noog kuv lug mej yeej yuav zoo sab qhov kws kuv moog cuag leej txwv, tsua qhov leej txwv muaj fwjchim luj dua kuv. 29 Nwgnuav kuv qha tej nuav tsua mej paub ua ntej, thaus muaj lawm mej txha le ntseeg kuv. 30 Kuv yuav tsw tau nrug mej thaam ntev lawm, tsua qhov tug kws kaav nplajteb saamswm yuav lug. Nwg yeej tsw muaj fwjchim kaav kuv. 31 Kuv yeej yuav ua ib puas tsaav yaam kws leej txwv kuas kuv ua, mas tuabneeg nplajteb txha paub has tas, kuv noog leej txwv lug. Ca le sawv peb moog.

### Yexu yog tsob txwv maab nyeg

**15** Kuv yog tsob tseem txwv maab nyeg. Kuv txwv yog tug kws tu tsob txwv maab ntawm. 2 Txhua tug ceg kws tsw txw txwv, kuv txwv muab txav pov tseg. Txhua tug ceg kws txw txwv nwg muab taav kuas yimfuab txw txwv ntau dua. 3 Tej lug kws kuv qha mej tub yog kuv taav mej ntaag. 4 Mej yuav tsum nrug kuv koom ua ib txujsa, mas kuv txha nrug mej koom ua ib txujsa. Yog mej tsw nrug kuv koom ua ib txujsa mej yeej txw tsw taug txwv. Ib yaam le tug ceg kws tsw ncau ntawm lub hauv paug, yog tug ceg tsw ncau ntawm lub hauv paug, tes tug ceg hov yeej txw tsw taug txwv.

5 Kuv yog lub hauv paug maab, mej yog cov ceg maab. Tug kws nrug kuv koom ua ib txujsa

tug ntawm yuav txw txwv ntau. Yog mej tsw nrug kuv koom ib txujsa mej yeej ua tsw tau ib yaam daabtsw le. 6 Tug kws tsw nrug kuv koom ua ib txujsa, tug hov zoo ib yaam le tug ceg kws luas muab txav pov tseg. Thaus qhuav lawm luas yuav tuaj muab zuas moog hlawv. 7 Yog mej nrug kuv koom ua ib txujsa, hab mej khaws kuv tej lug ca tsua huv mej lub sab tes mej xaav yuav yaam twg, mej ca le thov, mej yuav tau yaam ntawm. 8 Yog mej txw txwv ntau tes kuv txwv txha tau koob meej, hab mej yuav tau ua kuv cov thwjtim. 9 Kuv hlub mej ib yaam le kuv txwv hlub kuv. Mej yuav tsum ua kuas kuv tau chaw hlub mej moog le. 10 Yog mej ua lawv le kuv tej lug, kuv yuav hlub mej ib yaam le kuv ua lawv le kuv txwv tej lug ais kuv txwv hlub kuv.

11 Kuv qha le nuav tsua mej kuas mej txha tau nrug kuv zoo sab, hab mej yuav zoo sab kawg nkaus le. 12 Lu lug kws kuv qha tsua mej yog le nuav, mej ib leeg yuav tsum hlub ib leeg ib yaam le kuv hlub mej. 13 Tug kws hlub nwg tej kwvluag kawg kev nkaus yog tug kws tso txujsa lug tuag theej nwg cov kwvluag. 14 Yog mej ua lawv le kuv has, mej txha yog kuv cov kwvluag. 15 Nwgnuav kuv tsw hu mej ua tub qhe lawm, tsua qhov tug tub qhe yeej tsw paub tug tswv lub sab. Kuas kuv hu mej ua kwvluag, vem kuv tub qha txhua yaam kws kuv txwv qha kuv tsua mej lawm. 16 Tsw yog mej xaiv kuv, kuas yog kuv xaiv mej, hab tsaa kuas mej moog txw cov txwv kws yuav nyob moog ib txhws. Yog mej tuav kuv lub npe thov leej txwv ib yaam daabtsw tes nwg yuav pub yaam ntawm tsua mej. 17 Kuv qha tsua mej has tas, mej ib leeg yuav tsum hlub ib leeg.

Tuabneeg nplajteb yuav ntxub Yexu cov thwjtim

18 Yog tuabneeg nplajteb ntxub mej, mej yuav tsum ncu ntsoov has tas, puab tub xub ntxub kuv lawm. 19 Yog mej nyam ua lawv le tuabneeg nplajteb ua, tuabneeg nplajteb yeej yuav hlub mej tsua qhov mej ua lawv le puab ua. Kuas nwnuav mej tsw nyam ua lawv le tuabneeg nplajteb ua, tsua qhov kuv tub xaiv mej tawm huv nplajteb lawm, mas tuabneeg nplajteb txha ntxub mej.

20 Mej yuav tsum ncu ntsoov lu lug kws kuv tub has tsua mej tas, tug tub qhe yeej tsw muaj fwjchim luj dua nwg tug tswv. Puab tub tswm txom kuv lawm, puab txha yuav tswm txom mej hab. Yog puab ua lawv le kuv tej lug, puab yeej yuav ua lawv le mej tej lug hab. 21 Puab yuav tswm txom mej vem mej yog kuv cov thwjtim, puab tsw paub tug kws khaiv kuv lug. 22 Yog kuv tsw tau lug qha puab, puab yeej tsw muaj txem. Kuas nwnuav puab has tsw tau has tas, puab tsw muaj txem. 23 Tug kws ntxub kuv, tug ntawm yeej ntxub kuv txwv hab. 24 Yog kuv tsw tau lug ua tej kws tsw tau muaj tuabneeg ua dua tsua puab saib, tes puab tsw muaj txem. Kuas puab tub pum tej kws kuv tau ua lawm puab txha ntxub kuv hab ntxub kuv txwv. 25 Yeej yuav muaj lawv le nuav txha lawv le tej lug kws sau ca tsua huv puab txuj kevcai has tas, txawm yog kuv tsw tau ua txhum los puab laam ntxub kuv.

26 Tug paab yuav lug. Tug paab ntawm yog Vaajtswv tug Ntsuj Plig kws leej txwv khaiv lug qha qhov tseeb tsua suavdawg. Kuv yuav kuas leej txwv khaiv nwg lug, mas nwg yuav qha kuv tsua mej, 27 hab mej yuav pav txug kuv, tsua qhov mej ib txwm nrug kuv nyob thau u lug lawm.

**16** Kuv qha tej nuav tsua mej, mej txha tsw poob sab. 2 Luas yuav txwv tsw kheev mej moog noog lug qhuab qha huv tej tsev sablaaj. Tshuav tsw ntev nuav yuav muaj tuabneeg muab mej tua pov tseg. Qhov kws puab ua le ntawm puab xaav has tas, hum Vaaajtswv sab. 3 Vem puab tsw paub leej txwv hab tsw paub kuv, puab txha ua le hov tsua mej. 4 Kuv xub qha le nuav tsua mej, sub thaus txug nub kws puab tswm txom mej, mej txha ncu ntsoov kuv tej lug.

Vaaajtswv tug Ntsuj Plig teg num

Yaav taag lug lawm kuv tsw qha tej nuav tsua mej, tsua qhov kuv tseem nrug mej nyob. 5 Kuas nwgnuav kuv yuav moog cuag tug kws khaiv kuv lug los mej cov tub tsw muaj ib tug nug kuv has tas, koj yuav moog hov twg. 6 Kuv qha tej nuav tsua mej, mas mej ntxhuv sab kawg le. 7 Kuv qha tseeb tsua mej has tas, qhov kws kuv ncaim mej moog yuav paab mej heev dua le kws kuv nrug mej nyob. Yog kuv tsw ncaim mej moog tes tug paab yuav tsw lug cuag mej. Kuas yog kuv moog lawm kuv yuav khaiv nwg lug nrug mej nyob. 8 Thaus nwg lug nwg yuav qha kev txhum, kev ncaaj nceeg, hab kev txav txem tsua tuabneeg nplajteb paub tseeb. 9 Tog nwg qha kev txhum los vem yog tuabneeg nplajteb tsw ntseeg kuv. 10 Tog nwg qha kev ncaaj nceeg los vem yog kuv yuav moog cuag leej txwv mas yuav tsw muaj tuabneeg pum kuv lawm. 11 Tog nwg qha kev txav txem los vem yog tug Daab Ntxwg Nyooog kws kaav nplajteb tub raug txem lawm.

12 Tseem tshuav ntau yaam kws kuv xaav qha tsua mej, kuas ntshai nwgnuav mej yuav tsw nkaag

sab. 13 Thaus Vaaajtswv tug Ntsuj Plig kws qha qhov tseeb lug lawm, nwg yuav qha qhov tseeb huvsw tsua mej. Nwg yuav tsw has lawv le nwg sab xaav, nwg tsuas has tej kws nwg nov hab tej kws yuav muaj tshwm lug tsua mej xwb. 14 Nwg yuav muab kuv tej lug coj lug qha tsua mej, mas yuav ua tsua kuv tau koob meej. 15 Tej kws yog kuv txwv le puav leej yog kuv le hab. Tub yog le hov kuv txha qha tsua mej has tas, Vaaajtswv tug Ntsuj Plig yuav muab kuv tej lug coj lug qha mej.

Tug kws ntxhuv sab yuav tau zoo sab

16 Tshuav tsw ntev mej yuav tsw pum kuv, kuas dhau hov tsw ntev mej yuav rov pum kuv. 17 Yexu cov thwjtim muaj qee leej sws thaam has tas, nwg has tsua peb tas, tshuav tsw ntev peb yuav tsw pum nwg, kuas dhau hov tsw ntev peb yuav rov pum nwg. Nwg has le hov sov nwg has txug daabtsw ne. Hab nwg has dua ib lus has tas, kuv has le nuav tsua qhov kuv yuav moog cuag kuv txwv.

18 Puab sws nug zum quas zawg has tas, lu lug kws nwg has tas, tsw ntev, sov yog nwg has txug daabtsw. 19 Yexu paub tas, cov thwjtim xaav nug Yexu, tes Yexu txawm has tsua puab has tas, kuv tub has tsua mej has tas, tshuav tsw ntev mej yuav tsw pum kuv, kuas dhau hov tsw ntev mej yuav rov pum kuv. Mej sws nug txug lu lug kws kuv has tsua mej hov lub ntsab los. 20 Kuv qha tseeb tsua mej has tas, mej yuav quaj ntsoog quas qeeg kuas tuabneeg nplajteb yuav zoo sab kawg le. Mej yeej yuav ntxhuv sab, kuas mej tej kev ntxhuv sab hov yuav rov ua tsua mej zoo sab. 21 Tug quaspuj kws muaj mivnyuas huv plaab, thaus txug

caij yug nwg ua mob teb heev mas txhawj yug kawg le. Kuas thaus nwg yug tau lawm nwg tsw ncu txhawj lawm. Nwg zoo sab heev tsua qhov nwg tub tau mivnyuas lawm. 22 nwnuav mej ntxhuv sab ib yaam nkaus le tug quaspui hov, kuas thaus kuv rov lug cuag mej, mej yuav zoo sab kawg nkaus le. Tsw muaj leejtwg yuav txeeb tau mej txujkev zoo sab hov moog le.

23 Thaus txug nub ntawm mej yuav tsw nug kuv ib lus le lawm. Kuv qha tseeb tsua mej has tas, yog mej tuav kuv lub npe thov leej txwv pub ib yaam daabtsu tsua mej, nwg yeej yuav pub tsua mej. 24 Mej ib txwv tsw tuav kuv lub npe thov ib zag le, mej ca le thov mej txha tau. Thaus mej tau lawm mej yuav zoo sab kawg nkaus le.

### Yexu yog tug kws kaav nplajteb

25 Tej kws kuv has tsua mej nuav kuv ua pev lug has xwb. Kuas muaj ib nub kuv yuav tsw ua pev lug has tsua mej lawm. Kuv yuav ca le qha hlo leej txwv tsua mej paub. 26 Thaus txug nub ntawm mej yuav tuav kuv lub npe thov leej txwv. Kuv tsw tau has tas, kuv yuav paab mej thov leej txwv, 27 tsua qhov leej txwv yeej hlub mej. Nwg hlub mej tsua qhov mej nyam kuv hab mej ntseeg has tas, kuv yog tug kws Vaajtsuv khaiv lug. 28 Yeej yog leej txwv khaiv kuv lug huv nplajteb nuav tag. Nwnuav kuv saamswm yuav tawm huv nplajteb nuav rov moog cuag leej txwv.

29 Thaus Yexu has le hov taag Yexu cov thwj-tim txawm has tas, zag nuav koj qha hlo tsua peb tag laub. Koj tsw ua ib lus pev lug qha le.

Tej lug kws koj has, peb puav leej to taub zoo.  
 30 Nwgnuav peb paub has tas, koj paub ib puas  
 tsaav yaam huvsw lawm. Tsw taag peb yuav nug  
 koj dua le lawm. Tej nuav ua tsua peb paub tseeb  
 has tas, koj yog tug kws Vaajtswv khaiv lug tag.  
 31 Yexu teb puab has tas, nwgnuav mej ntseeg  
 tag tag lawm lov. 32 Yuav muaj ib lub swmhawm  
 kws mej yuav tso kuv tseg. Nwgnuav tub txug  
 lub swmhawm ntawm lawm. Mej nyag yuav tswv nyag  
 rov moog tsev. Mej txawm tswv le hov lawm los  
 tsw yog kuv tuab leeg nyob xwb, leej txwv yeej  
 nrug kuv nyob hab. 33 Kuv qha tej nuav tsua mej  
 paub sub mej cov kws tso sab tsua kuv txha le  
 tau zoo nyob kaaj sab quas lug. Tuabneeg nplaj-  
 teb yuav tswm txom mej, kuas mej tsw xob txhawj,  
 kuv tub kov yeej nplajteb lawm.

Yexu thov Vaajtswv paab cov thwjt看

**17** Thaus Yexu has le ntawm taag Yexu tsaa muag  
 saib sau ntuj. Yexu thov Vaajtswv has tas,  
 txwv, tub txug swmhawm lawm. Thov koj ua kuas  
 koj tug tub tau koob meej, koj tug tub txha le  
 ua tsua koj tau koob meej. 2 Tsua qhov koj tub  
 tsaa leej tub ua tug kws muaj fwjchim luj dua  
 tej tuabneeg huvsw. Mas leej tub txha pub tau  
 txujsa ntev moog ib txhws tsw kawg tsua txhua  
 tug kws koj muab tsua nwg. 3 Txujsa ntev moog ib  
 txhws tsw kawg ntawm yog qhov kws tuabneeg paub  
 koj hab paub has tas, koj tuab leeg yog Vaajtswv  
 hab paub Yexu Kheto kws koj khaiv lug. 4 Kuv ua  
 tsua koj tau koob meej huv nplajteb nuav. Teg  
 num kws koj kuas kuv ua kuv tub ua tav taag lawm.  
 5 Txwv, thov koj pub kuas kuv tau koob meej hab  
 tau tug fwjchim kws ci ntsaa quas ab tsua ntawm



koj lub xub ndag, ib yaam le kuv nrug koj muaj thaus tsw tau tswm ntuj tswm teb.

6 Kuv tub qha koj tsua cov tuabneeg kws koj xaiv lug ua kuv cov paub koj lawm. Puab yeej yog koj le, koj muab puab pub tsua kuv. Puab naj nub noog koj tej lug. 7 Nwgnuav puab paub tas, ib puas tsaav yaam kws koj muab tsua kuv puav leej yog koj le. 8 Tsua qhov tej lug kws koj qha kuv, kuv tub qha kuvsw tsua puab lawm. Puab khaws tej lug ntawm ca. Puab paub tseeb has tas, kuv lug ntawm koj lug, hab puab ntseeg tas yog koj khaiv kuv lug tag.

9 Qhov kws kuv thov koj nuav yog thov koj paab puab. Tsw yog thov koj paab tuabneeg nplajteb, kuas kuv thov paab cov tuabneeg kws koj tub muab tsua kuv lawm, tsua qhov puab yeej yog koj le. 10 Ib puas tsaav yaam kws kuv muaj kuj yog koj le. Ib puas tsaav yaam kws koj muaj kuj yog kuv le. Cov tuabneeg kws koj muab tsua kuv ntawm ua tsua kuv tau koob meej. 11 Nwgnuav kuv yuav rov qaab lug cuag koj. Kuv yuav tsw nyob huv nplajteb nuav lawm, kuas puab tseem nyob huv nplajteb. Txwv, koj yog tug kws zoo kawg nkaus. Thov koj tug fwjchim tsom kwm cov tuabneeg kws koj tub muab tsua kuv lawm. Sub puab txha ua tau ib lub sab ib yaam le koj hab kuv ua ib lub sab. 12 Thaus kuv tseem nrug puab nyob kuv naj nub saib puab tsua qhov koj yeej pub fwjchim tsua kuv ua teg num hov. Cov kws kuv saib tsw muaj ib tug raug kev puam tsuaj le. Tsuas yog tuab tug kws yeej yuav puam tsuaj txha le raug kev puam tsuaj xwb. Yeej yuav muaj le nuav txha lawv le tej lug kws sau ca tsua huv koj phoo

ntawv lawm. 13 Nwgnuav kuv saamswm yuav rov lug cuag koj. Kuas thaus kuv tseem nyob huv nplajteb nuav kuv has tej lug nuav sub puab txha zoo sab kawg nkaus ib yaam le kuv zoo sab. 14 Kuv tub qha koj tej lug tsua puab lawm, tuabneeg nplajteb txha le ntxub puab. Tsua qhov puab tsw yog tuabneeg nplajteb ib yaam le kws kuv tsw yog tuabneeg nplajteb. 15 Kuv tsw thov kuas koj koj puab tawm huv nplajteb nuav moog, kuas kuv thov koj saib puab kuas puab tsw xob maag Daab Ntxwg Nyooq lub vuj hlua. 16 Puab tsw yog tuabneeg nplajteb ib yaam le kuv tsw yog tuabneeg nplajteb. 17 Thov kuas koj txujlug kws yog lug tseeb koj puab lug ua koj le tuabneeg. 18 Kuv khaiv puab moog qha tuabneeg nplajteb ib yaam le koj khaiv kuv lug huv nplajteb nuav. 19 Yog vem kuv xaav paab kuas puab ua tau koj cov tuabneeg tag tag, kuv txha muab kuv lub cev huvsw pub tsua koj.

20 Tsw yog kuv thov koj paab cov tuabneeg nuav xwb, kuas kuv thov koj paab txhua tug kws nov txuj xuv zoo kws puab qha es lug ntseeg kuv. 21 Kuv thov koj paab kuas puab ua tau ib lub sab. Txwv, kuv xaav kuas puab nrug ib koom ib txujsa ib yaam le koj hab kuv koom ib txujsa. Thov koj paab kuas puab ua tau ib lub sab, sub tuabneeg nplajteb txha paub tseeb has tas, yog koj khaiv kuv lug. 22 Kuv ua tsua puab tau koob meej ib yaam le koj ua tsua kuv tau koob meej. Kuv ua le hov kuas puab ua tau ib lub sab ib yaam le koj hab kuv ib ua ib lub sab. 23 Kuv nyob huv puab, koj nyob huv kuv, sub puab txha thooj xeeb hum huv. Yog puab koom ib lub sab lawm tuabneeg nplajteb txha paub has tas, koj

khaiv kuv lug, hab txha paub has tas, koj hlub paub ib yaam le koj hlub kuv.

24 Txwv, kuv xaav kuas cov tuabneeg kws koj muab pub tsua kuv lawm nrug kuv nyob ua ke, paub txha le pum tug fwjchim luj kws koj pub tsua kuv. Tsua qhov thaus tsw tau tswm nplajteb koj yeej ib txwm hlub kuv. 25 Txwv, koj yog tug kws ncaaj nceeg. Tuabneeg nplajteb tsw paub koj kuas kuv paub koj. Cov tuabneeg nuav puav leej paub has tas, koj khaiv kuv lug. Kuv tub qha koj tsua paub paub lawm, 26 kuv tseem yuav naj nub qha paub hab. Kuv ua le nuav sub paub txha muaj lub sab sws hlub ib yaam le koj hlub kuv. Hab kuv yuav nyob huv paub lub sab.

Cov tub rog moog nteg Yexu

(Mth 26:47-56, Mlk 14:43-50, Lk 22:47-53)

**18** Thaus Yexu thov Vaajtswv taag lawm, Yexu txawm coj Yexu cov thwjtim hlaa lub kwj haa kws npe hu ua Khetoo moog saab tim u. Saab tim muaj ib lub vaaj. Mas Yexu hab cov thwjtim moog tsua huv lub vaaj hov. 2 Tug Yuta kws faav xeeb tsua Yexu, nwg yeej paub qhov chaw ntawm, tsua qhov Yexu tub pheej txeev coj cov thwjtim moog huv lub vaaj hov lawm. 3 Yuta txawm coj ib paab tub rog hab cov tub ceev xwm kws zuv lub tuam tsev tuaj huv lub vaaj. Cov tub rog ntawm yog cov kws cov pov thawj hlub hab cov Falixai khaiv tuaj. Puab coj ntaaj coj rag hab taws teeb taws tsau cig laam quas lug tuaj. 4 Yexu yeej paub ib puas tsaav yaam kws Yuta paub yuav ua tsua nwg. Nwg txawm txaav zog moog nug paub has tas, mej tuaj nrhav leejtwg. 5 Puab teb has tas, peb tuaj

nrhav tug Yexu kws yog tuabneeg Naxale. Yexu has tsua puab has tas, tub yog kuv ntaag los maj.

Tug Yuta kws faav xeeb tsua Yexu nrug puab sawv ua ke ntawm hab. 6 Thaus Yexu has tsua puab has tas, tub yog kuv ntaag los maj, tes puab ca le thaub pis ncho rov tom qaab qaug nplawg nta tsua huv peg teb. 7 Yexu rov nug puab has tas, mej tuaj nrhav leejtwg. Puab teb has tas, peb tuaj nrhav tug Yexu kws yog tuabneeg Naxale. 8 Yexu has tsua puab has tas, kuv tub qha tsua mej has tas, yog kuv nua ne. Yog mej tuaj nrhav kuv tag, mej ca le tso cov tuabneeg nuav moog. 9 Yexu has le nuav txha muaj lawv le tej lug kws nwg tub xub has lawm tas, txwv, cov tuabneeg kws koj muab tsua kuv tsw muaj ib tug raug kev puam tsuaj le. 10 Ximoo Pestus coj ib raabntaaj hab, tes nwg txawm rhu hlo nwg raab ntaaj lug tuab ntaag tsua tug tuam pov thawj hlub tug tub qhe saab nplooj ntseg xws tu nrho. Tug tub qhe ntawm npe hu ua Malakhu. 11 Yexu has tsua Pestus has tas, koj ca le muab koj raab ntaaj ntxwg rov tsua huv naab. Koj xaav has tas, kuv yuav tsw rws tej kev ab kev khwv kws kuv txwv muab tsua kuv nua los.

### Puab coj Yexu moog cuag Ana

12 Tug thawj rog hab nwg paab tub rog, hab Yutai cov tub ceev xwm txawm nrov ntwg lug nteg Yexu muab khi kag. 13 Puab xub coj Yexu moog cuag Ana kws yog Kayafa yawm txwv. Xyoo ntawm Kayafa ua tug tuam pov thawj hlub. 14 Kayafa yog tug kws has tsua cov Yutai has tas, ca ib tug tuag zoo dua le ca suavdawg tuag.

Pestus tsw leeg paub Yexu

(Mth 26:69-70, Mlk 14:66-68, Lk 22:55-57)

15 Ximoo Pestus hab muaj dua ib tug thwjtim ob tug lawv Yexu qaab moog. Tug tuam pov thawj hlub paub tug thwjtim ntawm, tug thwjtim hov txawm lawv Yexu qaab moog txug huv tug tuam pov thawj hlub lub loog. 16 Pestus sawv saab rooj vaag nrau. Tug thwjtim kws paub tug tuam pov thawj hlub tawm tuaj has tug nkauj qhev kws zuv lub rooj vaag, tes nwg txawm coj Pestus lug huv lub loog. 17 Tug nkauj qhev kws zuv rooj vaag has tsua Pestus has tas, koj yog tug txwv neej kws puab nteg ntawm ib tug thwjtim hab los sas. Pestus teb has tas, kuv tsw yog.

18 Mo ntawm no heev. Cov tub qhe hab cov tub ceev xwm puab rauv ib cub thee nte. Pestus txawm moog nrug puab sawv nte tawg.

Tug tuam pov thawj hlub nug Yexu

(Mth 26:59-66, Mlk 14:55-64, Lk 22:66-71)

19 Tug tuam pov thawj hlub nug Yexu txug Yexu cov thwjtim hab tej kws Yexu qha. 20 Yexu teb has tas, kuv naj nub taab meeg qha suavdawg. Kuv yeej ib txwm qha huv tej tsev sablaaj hab huv lub tuam tsev thov Vaajtswv. Cov tuabneeg Yutai yeej naj zag tuaj noog lug qhuab qha huv tej tsev ntawm. Kuv tsw tau npog tej lug kws kuv qha ib zaaj tsua hov twg le. 21 Koj tseem yuav nug kuv ua daabtsw. Koj ca le nug cov tuabneeg kws nov kuv qha saib kuv has le caag tsua puab los mab. Puab yeej paub tej lug kws kuv has huvsw. 22 Thaus Yexu has le ntawm tes

ib tug tub ceev xwm txawm tuab tawg ncuav tsua Yexu saab plhu, hab has tsua Yexu has tas, koj teb tug tuam pov thawj hlub le kos los. 23 Yexu has tsua hwg has tas, yog kuv has txhum koj ca le qha kuv qhov txhum tsua suavdawg los pauj. Kuas yog kuv has tseeb ua caag koj yuav laam ntaus kuv ua daabtsw.

24 Vem le hov Ana txha xaa Yexu moog tsua Kayafa kws ua tug tuam pov thawj hlub. Thaus ntawm puab tseem muab hlua khi quas nreeg Yexu.

Pestus rov tsw leeg paub Yexu

(Mth 26:71-75, Mlk 14:69-72, Lk 22:58-62)

25 Thaus Pestus tseem sawv nte tawg ntawm cub tawg, cov tuabneeg kws nyob ntawm has tsua Pestus has tas, koj yog tug txwv neej ntawm ib tug thwjtim hab los sas. Kuas Pestus tsw leeg le, Pestus has tas, kuv tsw yog. 26 Tug tuam pov thawj hlub ib tug tub qhe nug Pestus has tas, yaam le kuv tub pum koj nrug tug txwv neej ntawm nyob huv lub vaaj hab sub mab. Tug tub qhe hov hab tug tub qhe kws Pestus xuas ntaaj txav ib saab nplooj ntseg tu, ob tug yog kwvtij. 27 Pestus rov has tas, tsw yog kuv. Tes taamswm ntawm qab txawm qua.

Puab coj Yexu moog cuag Philaj

(Mth 27:1-2, Mlk 15:1-5, Lk 23:1-5)

28 Thaus kaaj ntug quas txoog puab coj Yexu tawm huv Kayafa tsev moog txug tom tim xyoob Philaj tsev. Cov Yutai tsw kaam moog huv tsev tsua qhov puab ntshai tsaam puab ua txhum puab

kevcai, tes puab tsw tau moog noj mov ua kevcai hlaa dhau. 29 Vem le ntawm Philaj txha tawm tuaj nug puab has tas, mej coj tug txwv neej nuav tuaj cuag kuv, nwg ua txhum daabtsw. 30 Puab teb has tas, yog nwg tsw tau ua txhum tes peb yeej tsw coj nwg tuaj cuag koj le. 31 Philaj has tsua puab has tas, mej ca le coj nwg moog rau txem lawv le mej kevcai los maj. Cov Yutai teb has tas, peb cov Yixayee tub tsw muaj ntawv tua tuabneeg nej. 32 Tej nuav muaj lawv le tej lug kws Yexu tub xub qha ua ntej lawm has tas, Yexu yuav tuag le caag. 33 Philaj rov moog huv tsev. Nwg kuas Yexu lug cuag nwg. Nwg nug Yexu has tas, koj yog cov Yutai tug vaaj ntxwv los. 34 Yexu teb has tas, koj yeej xaav tau le kos, los yog lwm tug qha tsua koj. 35 Philaj teb has tas, koj xaav has tas, kuv yog tuabneeg Yutai hab nua los. Tub yog koj tsaav tuabneeg hab puab cov pov thawj hlub nteg koj tuaj tsua kuv nev, ais yog koj ua txhum daabtsw. 36 Yexu has tsua Philaj has tas, kuv tsw yog tug kws kaav huv nplajteb nuav. Yog kuv kaav huv nplajteb nuav tes kuv cov thwjtim yeej yuav tawm tsaam tsw kheev leejtwg nteg tau kuv coj moog tsua cov Yutai. Kuv tsw yog tug vaaj ntxwv kws kaav lub tebchaws nuav. 37 Philaj has tsua Yexu has tas, yog le ntawm koj yog ib tug vaaj ntxwv los. Yexu teb has tas, koj yog tug kws hu kuv ua vaaj ntxwv. Qhov tseem ceeb kws kuv lug yug huv nplajteb nuav tub yog kuv xaav qha qhov tseeb. Tug kws nyam qhov tseeb tug ntawm yeej yuav noog kuv tej lug. 38 Philaj txawm nug Yexu has tas, qhov tseeb yog daabtsw.



Cov pejxeem thov Philaj tso Npalanpa  
(Mth 27:15-18, Mlk 15:6-11, Lk 23:13-19)

Thaus Philaj has le ntawm taag, Philaj txawm tawm lug has tsua cov Yutai has tas, kuv tsw pum nwg ua ib qho txhum le. 39 Kuas lawv le mej kevcai mas thaus mej ua kevcai hlaa dhau kuv yuav tso ib tug tuabneeg raug txem dim. Mas zag nuav mej xaav kuas kuv tso cov Yutai tug vaaj ntxwv tsua mej los tsw xaav. 40 Thaus cov pejxeem nov Philaj has le hov puab txawm qw ntsoog quas qeeg has tas, tsw xob tso nwg, koj ca le tso Npalanpa. Npalanpa yog ib tug nam tub saab tua tuabneeg.

Cov tub rog ua saib tsw taug Yexu  
(Mth 27:27-31, Mlk 15:16-20)

**19** Tes Philaj txawm muab Yexu tsua cov tub rog nplawm. 2 Cov tub rog muab xuav paug lug qhab ua kauj looj Yexu taubhau, hab muab ib lub tsho ntev yimlaaj khu tsua Yexu naav. 3 Puab laam has ua dog ua dig tsua Yexu has tas, cov Yutai tug vaaj ntxwv, koj yuav tau zoo lauj. Puab txawm xuas tawg ncuav tsua Yexu lub plhu.

Philaj txav txem tsua Yexu  
(Mth 27:20-26, Mlk 15:12-15, Lk 23:20-25)

4 Philaj tawm rov lug has tsua cov pejxeem has tas, kuv yuav coj nwg lug tsua mej saib, sub mej txha paub tas, kuv tsw pum nwg ua ib qho txhum le. 5 Cov tub rog txawm coj Yexu tawm lug tsua saab nrau. Thaus hov Yexu tseem ntoo quas nreeg lub kauj xuav paug hab naav lub tsho ntev

yimlaaj. Philaj has tsua cov pejxeem has tas, mej swm saib nwg saib, nwg nyob ntawm nuav.

6 Thaus cov pov thawj hlub hab cov tub ceev xwm pum dheev Yexu, puab txawm qw nrov nrov has tas, muab nwg teem tsua sau ntoo khaublig. muab nwg teem tsua sau ntoo khaublig. Philaj teb puab tas, mej ca le coj moog teem mej los maj. Kuv yeej tsw pum nwg ua ib qho txhum hlo le. 7 Cov Yutai teb has tas, peb muaj ib txuj kevcai qha has tas, tswm nyog muab nwg tua pov tseg tsua qhov nwg khaav has tas, nwg yog Vaajtswv tug tub.

8 Thaus Philaj nov le hov Philaj yimfuab ntshai heev. 9 Philaj rov moog nug Yexu huv tsev has tas, koj nyob hov twg tuaj. Kuas Yexu tsw teb ib lus le. 10 Philaj has tsua Yexu has tas, koj txawm tsw teb kuv le los. Koj tsw paub tas, kuv muaj fwjchim tso koj dim, hab kuv muaj fwjchim kuas muab koj teem tsua sau ntoo khaublig nua los. 11 Yexu teb has tas, yog Vaajtswv tsw pum zoo ca koj ua le caag tsua kuv, koj yeej tsw muaj fwjchim ua. Vem le nuav tug kws nteg kuv tuaj tsua koj tseem muaj txem luj dua koj.

12 Thaus Philaj nov Yexu has le ntawm, Philaj yimfuab xaav muab Yexu tso, kuas cov Yutai qw ntsoog quas qeeg has tas, yog koj muab nwg tso koj yeej tsw nrug fuabtais Xixa sws raug zoo lawm. Tug kws khaav has tas, nwg yog ib tug vaaj ntxwv, tes kuj yog nwg ua yeeb ncuab tsua fuabtais Xixa. 13 Thaus Philaj nov le ntawm, Philaj txawm coj Yexu tawm lug tsua saab nrau. Philaj nyob sau lub rooj tu plaub. Lub chaw ntawm npe hu ua lub chaw pua pob zeb. Lug Heplais hu ua Kanpatha.

14 Thaus hov tub yuav taav su. Nub hov yog nub kws suavdawg npaaj hov txhua chaw ua kevcai hlaa dhau. Philaj has tsua cov Yutai has tas, mej tug vaaj ntxwv nyob ntawm nuav. 15 Kuas cov pejxeem qw ntsoog quas qeeg has tas, coj nwg moog tua pov tseg, coj nwg moog tua pov tseg. Muab nwg teem tsua sau ntoo khaublig Philaj nug puab has tas, mej txawm xaav kuas kuv muab mej tug vaaj ntxwv teem tsua sau ntoo khaublig ntaag los. Cov pov thawj hlub teb has tas, peb muaj tuab tug vaaj ntxwv xwb, yog fuabtais Xixa. 16 Tes Philaj txawm muab Yexu tsua puab coj moog teem tsua sau ntoo khaublig.

Muab Yexu teem sau ntoo khaublig  
(Mth 27:32-44, Mlk 15:21-32, Lk 23:26-43)

Cov tub rog txawm coj Yexu tawm moog. 17 Puab muab tug ntoo khaublig tsua Yexu kwv. Puab coj nwg moog txug ib qhov chaw npe hu ua roob txhaa taubhau. Lug Heplais hu ua Khaulakhautha. 18 Thaus puab moog txug qhov chaw ntawm puab txawm muab Yexu teem tsua sau ntoo khaublig. Puab coj ob tug txwv neej tuaj teem tsua sau ob tug ntoo khaublig hab. Puab muab ib tug txhus tsua Yexu saab phem, muab ib tug txhus tsua Yexu saab xws, Yexu nyob nruab nraab. 19 Philaj sau ib daim txag teem tsua sau Yexu tug ntoo khaublig has tas, tug Yexu kws yog tuabneeg Naxale, yog cov Yutai tug vaaj ntxwv. 20 Qhov chaw kws puab muab Yexu teem tsua sau ntoo khaublig ntawm nyob ze ze lub nroog. Mas cov Yutai kws moog moog lug lug muaj ntau leej nyeem daim txag kws Philaj sau, vem Philaj sau ua lug Heplais hab lug Loo hab lug Kili. 21 Yutai cov pov thawj hlub has

tsua Philaj has tas, koj tsw xob sau has tas, cov Yutai tug vaaj ntxwv. Koj yuav tsum sau has tas, tug txwv neej nuav, nwg has tas, nwg yog cov Yutai tug vaaj ntxwv. 22 Philaj teb puab has tas, sau le kuv sau ntawm, tau lawm lauj.

23 Thaus cov tub rog muab Yexu teem tsua sau ntoo khaublig lawm, puab muab Yexu tej rwg tsho koj lug faib ua plaub co. Ib leeg yuav ib co. Tshuav Yexu lub tsho ntev xwb. Lub tsho ntawm luas ntus thoob plawg tsw muaj lej leeg le.

24 Cov tub rog txawm sws thaam has tas, peb tsw xob muab dua faib. Ca peb twv saib leejtwg tau, tes ca leejtwg yuav xwb. Tej kws puab ua nuav muaj lawv le tej lug kws sau ca tsua huv Vaaj-tswv phoo ntawv has tas,

Puab muab kuv tej rwg tsho sws faib.

Puab muab kuv lub tsho ntev twv saib leejtwg tau.

Tes cov tub rog txawm ua le ntawm tag.

25 Yexu nam hab Yexu nam tug nam hluas, hab Maivlag kws yog Kelaupa tug quaspuj, hab Maivlag Matala puab sawv ze ze ntawm Yexu tug ntoo khaublig. 26 Yexu pum Yexu nam hab tug thwjtim kws Yexu nyam heev sawv ntawm. Yexu has tsua Yexu nam has tas, tug kws nrug koj sawv ntawm kos nwg yog koj tug tub. 27 Yexu has tsua tug thwjtim ntawm has tas, tug kws nrug koj sawv ntawm kos yog koj nam. Txwj nub ntawm lug tug thwjtim ntawm koj Yexu nam moog nrug nwg nyob.

Yexu tuag (Mth 27:45-46, Mlk 15:33-41, Lk 23:44-49)

28 Yexu paub tas, ib puas tsaav yaam tub tav taag lawm, Yexu txha has tas, kuv nqhes dej. Nwg has le hov txha lawv le tej lug kws sau ca tsua huv Vaajtswv phoo ntawv. 29 Nyob ntawm muaj ib taig kua txwv maab qaub. Puab muab ib tug paas chob ib lub taub ntxuav yag raus cov kua qaub hov cev tsua ntawm Yexu qhov ncauj. 30 Thaus Yexu swm mivntswv taag, Yexu has tas, tav lawm lauj. Yexu nyo hau ntshws tu sav nrho taam swm ntawm.

Cov tub rog xuas muv nkaug Yexu saab taav

31 Tes cov Yutai thov Philaj ca puab moog muab peb tug kws teem tsua sau ntoo khaublig tsoo kuas luv ceg, hab muab txu sau ntoo khaublig moog. Puab ua le ntawm tsua qhov nub hov yog nub tswb, nub tom qaab yog nub su lawm. Puab tsw xaav ca tuabneeg nyob sau ntoo khaublig tsua nub su, hab nub su kws yuav txug hov yog nub kws tseem ceeb dua lwm nub su, tsua qhov yog nub kws puab ua kevcai hlaa dhau. 32 Cov tub rog txawm moog muab ob tug kws raug teem sau ntoo khaublig ib yaam le Yexu tsoo luv ceg. Puab xub muab tug saab tom nuav tsoo luv, le maav muab tug saab tom tsoo luv. 33 Thaus puab yuav tsoo Yexu le kuas luv, mas puab pum tas, Yexu tub tuag lawm, puab txawm tsw tsoo. 34 Kuas muaj ib tug tub rog xuas muv nkaug Yexu saab taav to ntshua ntshaav hab dej lug txuas quas ntsog. 35 Tug kws pum tej xwm nuav, nwg tub qha tsua suavdawg lawm. Peb paub has tas, tej kws nwg has yeej muaj tseeb tag. Tug ntawm

nwg paub has tas, nwg tsw daag le, mej txha tso sab tau tsua nwg tej lug. 36 Tej nuav muaj lawv le tej lug kws sau ca tsua huv Vaaajtswv phoo ntawv has tas, luas yuav tsw muab nwg tej pob txhaa ib yaag luv le. 37 Hab muaj dua ib lus has tas, yuav muaj tuabneeg saib quas ntsoov tug kws luas xuas muv nkaug.

Log Yexu (Mth 27:57-61, Mlk 42:47, Lk 23:50-56)

38 Dhau hov ntawm tug Yauxej kws tuaj peg lub moos Alimatha tuaj, nwg moog thov Yexu lub cev ntawm Philaj. Thaus nwg thov tau lawm nwg txawm moog muab Yexu lub cev txu coj moog log. Yauxej yeej yog Yexu ib tug thwjtim kuas nwg tsw qha tsua leejtwg le tsua qhov nwg ntshai cov Yutai. 39 Tug Nikautemau kws yaav tom ntej moog nrug Yexu thaam mo ntuj kuj tuaj paab Yauxej hab, nwg nqaa ib co roj ntoos tsw-qaab hab ib co tshuaj tsw-qaab npe hu ua alau-e sws xyaw kwvlaam muaj peb caug tswb kiluv. 40 Ob tug txawm muab tej nrhoob ntaub maag hab cov tshuaj tsw-qaab ntawm qhwv Yexu lub cev lawv le cov Yutai ib txwm ua. 41 Muaj ib lub vaaj nyob ze qhov chaw kws puab muab Yexu teem tsua sau ntoo khaublig. Huv lub vaaj ntawm muaj ib lub qhov ntxaa tshab kws tseem tsw tau muaj leejtwg coj tuag moog log tsua huv ib zag le. 42 Nub tom qaab yog nub kws cov Yutai su, puab txha le muab Yexu lub cev coj moog log tsua huv lub qhov ntxaa kws nyob ze ntawm.

Yexu sawv huv qhov tuag rov lug  
(Mth 28:1-8, Mlk 16:1-8, Lk 24:1-12)

**20** Nub athib thaus tseem tsw tau pum kev, Maivlag Matala moog tom lub ntxaa. Nwg pum daim laag zeb kws npug lub rooj ntxaa tub dov tsua ib qho lawm. 2 Maivlag txawm dha rov lug has tsua Ximoo Pestus hab tug thwjtim kws Yexu nyam has tas, muaj tuabneeg tub tuaj muab peb tug tswv Yexu lub cev rhu tawm huv lub qhov ntxaa lawm, sov luas coj moog tsua twg lawm peb tsw paub le. 3 Pestus hab tug thwjtim ntawm txawm dha moog tom lub ntxaa. 4 Tug thwjtim kws Yexu nyam dha ceev dua Pestus, nwg xub moog txug lub ntxaa. 5 Nwg nyo ntshws xauj huv lub qhov ntxaa. nwg pum cov ntaub maag nyob ib nyuas pawg ca, kuas nwg tsw nkaag tsua huv. 6 Thaus Ximoo Pestus moog txug, Ximoo Pestus txawm nkaag plawg tsua huv lub ntxaa. Nwg pum cov ntaub maag nyob ib pawg huv. 7 Hab nwg pum daim ntaub kws qhvw Yexu taubhau tais ca tsua ib qho tsw xyaw cov ntaub maag. 8 Tug thwjtim kws xub tuaj txug le maav nkaag tsua huv hab. Nwg pum tej ntawm, nwg ntseeg has tas, muaj le ntawm tag. 9 Ob tug tseem tsw tau nkaag sab tej lug kws Vaajtswv phoo ntawv qha tseg has tas, nwg yuav sawv huv qhov tuag rov lug. 10 Tes ob tug txawm rov moog tsev.

Yexu lug tsua Maivlag Matala pum  
(Mth 28:9-10, Mlk 16:9-11)

11 Maivlag sawv ze ze lub ntxaa. Maivlag quaj quaj. Thaus nwg tseem quaj quaj nwg nyo ntshws xauj huv qhov ntxaa. 12 Nwg pum ob tug tubkhai sau ntuj naav rwg tsho dawb dawb nyob



ntawm lub chaw kws puab tso Yexu lub cev, ib tug nyob ntawm taubhau, ib tug nyob ntawm kwtaw. 13 Ob tug nug Maivlag has tas, leej muam ua caag koj quaj. Maivlag teb has tas, sov leejtwg muab kuv tug tswv coj moog tsua twg lawm kuv tsw paub le. 14 Thaus Maivlag has le ntawm taag, Maivlag txawm tig hlo lug pum Yexu sawv ntawm nwg ib saab, kuas nwg tsw paub tas, yog Yexu. 15 Yexu has tsua Maivlag has tas, mivntxhais, koj quaj daabtsw, koj tuaj nrhav leejtwg. Maivlag xaav has tas, ntshai tug hov yog tug kws tu lub vaaj. Maivlag txha has tsua Yexu has tas, yawm laug, saib yog koj tau muab nwg lub cev coj moog tso tsua twg lawm thov koj qha tsua kuv, kuv yuav moog nqaa nwg lub cev rov qaab lug. 16 Yexu has tsua Maivlag has tas, Maivlag, tes Maivlag txawm tig hlo moog saib hab has tas, lanpauni. Lu lug hov yog lug Heplais txhais has tas, xwbfbw. 17 Yexu has tsua Maivlag has tas, koj tsw xob rawm tuav kuv tsua qhov kuv tseem tsw tau rov moog cuag kuv txwv. Koj ca le rov moog has tsua kuv cov thwjtim has tas, kuv yuav rov moog cuag tug kws yog kuv txwv hab mej txwv. Nwg yog kuv tug Vaajtswv hab yog mej tug Vaajtswv. 18 Maivlag Matala txawm rov moog has tsua Yexu cov thwjtim has tas, kuv tub pum peb tug tswv Yexu lawm. Hab Maivlag qha Yexu tej lug tsua puab.

Yexu tshwm tsua Yexu cov thwjtim pum  
(Mth 28:16-20, Mk 16:14-18, Lk 24:36-49)

19 Nub athib thaus tsaus ntuj cov thwjtim tuaj nyob ua ke huv ib lub tsev. Puab ntsug qhov rooj zoo zoo huvsw, vem puab ntshai cov Yutai. Tes Yexu txawm lug sawv huv plawv puab, Yexu has

tsua puab has tas, mej ca le tau zoo nyob kaaj sab quas lug. 20 Thaus Yexu has le hov taag, Yexu txawm cev Yexu ob txhais teg hab thws nwg saab taav tsua puab saib. Puab zoo sab kawg le tsua qhov puab pum tug tswv Yexu lawm. 21 Yexu txawm rov has tsua puab has tas, mej ca le tau zoo nyob kaaj sab quas lug. Kuv yuav khaiv mej moog ib yaam nkaus le leej txwv khaiv kuv lug. 22 Thaus Yexu has le ntawm taag, Yexu txawm tshuab paa tsua puab hab has tas, mej ca le txais Vaajtswv tug Ntsuj Plig tsua huv mej lub sab. 23 Yog mej zaam txem tsua leejtwg tes leejtwg yuav tsw raug txem. Kuas yog mej tsw zaam txem tsua leejtwg, tug ntawm yuav raug txem.

### Thauma tsw ntseeg tas yog Yexu

24 Thaus Yexu lug cuag puab, tug thwjtim Thauma kws muaj dua npe hu ua Ntxaib, tsw nrug puab nyob ntawm. 25 Puab txha qha tsua nwg has tas, peb tub pum tug tswv Yexu lawm. Thauma has tsua puab has tas, yog kuv qhov muag tsw pum lub qhov ntsa hlau huv nwg xwb teg, hab yog kuv tsw tau muab kuv tug ntiv teg xuas lub qhov ntsa hlau, hab xuas lub qhov kws puab nkaug nwg saab taav, tes kuv yeej tsw ntseeg le.

26 Tau yim nub tom qaab cov thwjtim rov qaab tuaj nyob ua ke huv tsev. Zag nuav Thauma nrug puab nyob. Puab tub ntsug qhov rooj zoo zoo lawm, kuas Yexu lug sawv huv plawv puab. Yexu has tsua puab has tas, mej ca le tau zoo nyob kaaj sab quas lug. 27 Yexu txawm has tsua Thauma has tas, koj ca le cev koj tug ntiv teg lug xuas kuv lub xwb teg, hab cev koj txhais teg xuas lub

qhov ntawm kuv saab taav. Koj tsw xob ua cis faav cis fwm, koj ca le ntseeg. 28 Thagma teb Yexu has tas, koj yog kuv tug tswv hab yog kuv tug Vaajtswv. 29 Yexu has tsua Thagma has tas, koj pum kuv koj txha ntseeg los. Tug kws yeej tsw tau pum kuv kuas nwg ntseeg, tug ntawm yuav zoo sab kawg le.

### Phoo ntawv nuav lub ntsab

30 Yexu cov thwjtim pum Yexu ua ntau yaam txujci tseem ceeb, kuas kuv tsw tau muab sau huvsw tsua huv phoo ntawv nuav. 31 Tej kws kuv sau ca tsua huv phoo ntawv nuav, tub yog sau qha kuas suavdawg paub tseeb has tas, Yexu yog Vaajtswv tug tub kws Vaajtswv khaiv lug ua Cawmseej, mas txhua tug kws ntseeg Yexu yuav tau txujsa ntev moog ib txhws tsw kawg kws Vaajtswv pub.

### Yexu tshwm tsua xyaa tug thwjtim pum

**21** Dhau hov ntawm Yexu lug tshwm tsua Yexu cov thwjtim pum nraag ntug hav txwv Tinpela lawv le kws kuv has nuav. 2 Cov thwjtim nrug Ximoo Pestus nyob ua ke, ib tug yog Thagma kws muaj dua npe hu ua Ntxaib, ib tug yog Nathane kws nyob peg lub zog Khana huv Kalilai tebchaws, hab Xepetai ob tug tub, hab muaj dua ob tug thwjtim nrug puab nyob ua ke ntawm hab. 3 Ximoo Pestus txawm has tsua cov thwjtim has tas, kuv yuav moog ntaus ntseg. Puab teb tas, peb yuav nrug koj moog hab. Tes puab suavdawg txawm nce moog tsua huv nkoj, moog ntaus ib mos ntseg kuas tsw tau ib tug le. 4 Thaus kaaj ntug quas txoog Yexu lug sawv ntawm ntug hav txwv, kuas cov thwj-

tim tsw paub has tas, yog Yexu. 5 Yexu has tsua paub has tas, cov mivnyuas mej ntaus tsw tau ntseg le los. Puab teb has tas, ntaus tsw tau ib tug le. 6 Yexu qha paub has tas, mej ntaus ib vaag ntawm lub nkoj saab xws tsua huv txha tau ntseg. Puab txawm ntaus ib vaag tsua huv mas maag tau ntseg ntau kawg le, puab nqug tsw taug lub vaag lug tsua huv nkoj le. 7 Tug thwjtim kws Yexu nyam txawm has tsua Pestus has tas, tug kws sawv tim yog peb tug tswv Yexu los sas. Thaus Ximoo Pestus nov dheev has tas, yog tug tswv Yexu, tes Ximoo txawm muab Ximoo lub tsho lug naav, hab tuabplhaw tsua huv hav txwv. Yog Ximoo tub muab tsho hle lawm, nwg txha muab lug naav. 8 Cov thwjtim kws nyob huv lub nkoj puab nkuam lub nkoj hai lub vaag kws maag tau ntseg puv nkaus lug, tsua qhov puab nyob deb tim ntug nqhuab kwvlaam tswb caug daaj xwb. 9 Thaus puab nqeg sau nkoj lug puab pum ib cub thee cig quas plawg, muaj ntseg hab ncuav ci sau cub thee hov. 10 Yexu has tsua paub has tas, mej ca le nqaa cov ntseg kws mej nyav ntaus tau ob peb tug lug hab. 11 Ximoo Pestus nce moog sau lub nkoj, moog nqug lub vaag kws maag tau ntseg ntau ntau lug tsua tim ntug. Cov ntseg luj luj kws puab ntaus tau hov muaj ib puas tswb caug peb tug. Txawm yog maag tau ntseg ntau npaum le ntawm los lub vaag kuj tsw nduag. 12 Yexu hu puab has tas, mej ca le lug noj mov. Cov thwjtim tsw muaj ib tug muaj cuab kaav nug Yexu has tas, koj yog leej-twg, tsua qhov puab paub has tas, nwg yog puab tug tswv. 13 Yexu muab ncuav hab ntseg faib tsua paub noj.

14 Txwj nub kws Yexu sawv huv qhov tuag rov

qaab lug, nwg lug tshwm tsua cov thwjt看 pum peb  
zag tsua zag nuav.

### Yexu ntuag Pestus

15 Thaus puab noj tshais taag, Yexu has tsua  
Ximoo Pestus has tas, Ximoo Yauhaa tug tub, koj  
nyam kuv heev dua tej los. Ximoo teb has tas,  
tug tswv, koj yeej paub has tas, kuv nyam koj.  
Yexu has tsua Ximoo has tas, koj ca le saib kuv  
cov mivnyuas yaaj tuab zoo. 16 Yexu rov nug Ximoo  
zag ob has tas, Ximoo Yauhaa tug tub, koj nyam  
kuv los tsw nyam. Ximoo teb has tas, tug tswv,  
koj yeej paub has tas, kuv nyam koj. Yexu has  
tsua Ximoo has tas, koj ca le saib kuv paab yaaj  
tuab zoo. 17 Yexu rov nug Ximoo zag peb has tas,  
Ximoo Yauhaa tug tub, koj nyam kuv los tsw nyam.  
Pestus ntxhuv sab tsua qhov Yexu has peb zag  
tsua Pestus has tas, koj nyam kuv los tsw nyam.  
Pestus txawm has tsua Yexu has tas, tug tswv koj  
paub ib puas tsaav yaam huvsw, koj yeej paub has  
tas, kuv nyam koj. Yexu has tsua Pestus has  
tas, koj ca le saib kuv paab yaaj tuab zoo.  
18 Kuv qha tseeb tsua koj has tas, thaus koj  
tseem hluas, koj xaav moog hov twg, tes koj ca  
le tu cev moog lawm. Kuas thaus koj laug lawm,  
koj yuav xyaab teg tsua luas khi, hab luas yuav  
coj koj moog qhov chaw kws koj tsw xaav moog.  
19 Yexu has le ntawm yog Yexu qha has tas, Pestus  
yuav tuag le caag txha ua tsua Vaajtswv tau  
koob meej. Yexu has tsua Pestus has tas, koj  
ca le nrug kuv moog.

Tug thwjtim kws Yexu nyam

20 Pestus tig moog pum tug thwjtim kws Yexu nyam sawv tom qaab. Tug thwjtim hov yog tug kws ua ntej hov ncaav moog pheeb Yexu xub ndag es nug Yexu sau rooj mov has tas, tug tswv, leej-twg yuav faav xeeb tsua koj. 21 Thaus Pestus pum dheev tug thwjtim ntawm Pestus has tsua Yexu has tas, tug tswv ua le es tug hov nev nwg yuav zoo le caag. 22 Yexu teb Pestus has tas, yog kuv ca nwg nyob moog txug nub kws kuv rov qaab lug, los yuav txug koj quas nkig daabtsw. Koj ca le nrug kuv moog. 23 Tes cov ntseeg xyaav zum quas zawg has tas, tug thwjtim hov yuav tsw tuag le. Kuas Yexu yeej tsw tau has tas, tug thwjtim hov yuav tsw tuag. Yexu has tas, yog kuv ca nwg nyob txug nub kws kuv rov qaab lug los yeej tsw txug koj quas nkig.

24 Tug thwjtim ntawm yog tug kws has txug tej nuav hab muab sau ca tsua huv ntawv. Peb paub has tas, tej lug kws nwg has muaj tseeb tag.

25 Tseem tshuav ntau yaam kws Yexu ua. Kuv xaav tas yog muab tej hov huv tuab sw sau ca tsua huv ntawv, ntshai nplajteb yuav tsw muaj chaw txaus rau tej ntawv ntawm.